

ጳውሎስ ቆርንቶሳ አሳው ፃፊዳ ኮይሮ ከታ ጌሉዋ

ጳውሎስ ቆርንቶሳ አሳው ፃፊዳ ኮይሮ ከታይ፡ ጳውሎስ ቆርንቶሳ ካታማን ዳዒያ አማኒያዎንቱ ጊደን ኪሪስቲና ደዑዋኔ አማኑዋ ያሊያባን ዳንዴዳ ሜቱዋ ጳጴሳናው ቆፒዳ ፃፊዳዋ። ሄ ዋዴ ቆርንቶሳ ካታማይ ሄ ጋዴን ዳዒያ አሳይ ጎዔቲያ ኤሬቲዳ ጌሪኬ ካታማ። ሄዋ ቦላካ ቃሲ አካዪያ ጌቲቲያ ሮማ ካወቲሳሲ ሁጹ ካታማ። ሃ ካታማይ ዋልቃማ ዛለዒያን፡ ጋሚዒዳ ሚኔዳ ዋጋን፡ ሎይሲ እኪ እኪ ቢያ ዬዳ ደዑዋን ዋይ ጌቤናባ ሃኒያዋኒኔ ሃይማኖቲያ ጮራቲላን ኤሬቲዳዋ።

ዬሱሲ ከቲዳዌ ሚኒሲዴ ኦዳናው ኮዬዳዌ፡ ሄ አማኒያዎንቱ ጊደን ዳዒያ ሻኮቲላባኔ ዬዳ ደዑዋባ፡ ዋሹማባኔ ጌሉዋ አካባ፡ ዋሳ ጎሌ ዋጋባ፡ ጌሻ ኣያና አዎታቱዋባኔ ሃይቁዋ ዳንዲዋባ። ዬሱሲ ከቲዳዌ ሃ ሚሺራቹዋ ቃላ ሃ ኦሻቱዋ ቦላ ሚኒሲዴ ኦዲያዋ ናጊዴ ሺሺ።

ሰቁ ያሳይ ባሬ አሳሲ አሜዳ አዎታ ኡባፔ አጲያዋ ጊዲያዋ ኦዲያ ሸዎቸዋ ታማኔ ሄዙ፡ ሃ ማፃፋን ዳሮ ኤሬቲዳዋ ጌቲቲዳ ቆፊቲ።

ሸዎጋቱዋ ኡባቱዋሲ አሜቲዳ ቃንሳ ቆፋቱዋ

- ጌሉዋ (1:1-9)
- አማኒያዎንቱ ጊደን ዳንዴዳ ሻኮቲላ (1:10-4:21)
- ዬዳ ደዑዋባኔ ሰይ አሳ ደዑዋባ (5:1-7:40)
- አማኒያዎንታኔ ኪሪስቲና አማኑዋ አኪቤናዎንታ (8:1-11:1)
- አማኒያዎንቱ ደዑዋኔ ጎሼታ ዋጋ (11:2-14:40)
- ኪሪስቶሲ ሃይቁዋ ያኒ ዳንዲዋኔ አማኒያዎንቱ ዳንዲዋባ (15:1-58)
- ዬሁደን ዳዒያ ሜቶታንቻቱዋሲ አሜቲዳ ማዲዋባ (16:1-4)
- ዉርሴላ ቁቲያ (16:5-24)

1 ታኒ፡ ያሳ ሸኒያን ዬሱሲ ኪሪስቶሲ ከቲዳዋ ጊዳናው ያህጌቲዳ ጳውሎስኔ፡ ኑ አሻ ሶስቲኒሲ፡ 2 ቆርንቶሳን ዳዒያ ያሳ አማኒያ አሳቱዋሲ፡ ዬሱሲ ኪሪስቶሳን ጌዬዳዎንቱሲኔ፡ ኑሲ ጎዳ

ጊዲያ ኑ ጎዳ ዩሱሲ ኪሪስቶሳ ሱንላ ኡባ ሳዓን ዪሲያ ኡባቱዋና ጌሻ ጊዳናው ዪሴቲዳዋንቲሲ ሃ ደቢዳቢያ ፃፊቶ።

3 ያሳይ፡ ኑ አዉኔ ኑ ጎዳይ ዩሱሲ ኪሪስቶሲ ሂንቴንቲሲ አቆ ኬካቴላኔ ሳሮቴላ አሞ።

ያሳ ጋላቲሳ

4 ያሳይ ኪሪስቶሳ ዩሱሳ ባጋና ሂንቴንቲሲ አሜዳ አቆ ኬካቴላ ዲራው፡ ታኒ ኡባ ዋዴ ሂንቴንቲሲ ያሳ ጋላታይ። 5-6 ታኒ ኪሪስቶሳሲ ማርካቲያዌ ሂንቴንቲን ማኔዳ ዲራው፡ ሂንቴ ኡባባኒ፡ ሃሳያ ኡባን ኤራቴላ ኡባን፡ አኒ ዲራቴዲታ። 7 ሃዋዳን ሂንቴ ኑ ጎዳ ዩሱሲ ኪሪስቶሳ ዩሳ ናጊሺን፡ አያና አሞታፔ ሃራይ አቶ አቱኔ ሂንቴንቲሲ ፓጩና። 8 ቃሲ ኑ ጎዳ ዩሱሲ ኪሪስቶሳ ጋላሳን ሂንቴ ካቆ ባይናዋንታ ጊዳናዳን፡ ወርሴላይ ጋካናው ኢ ሂንቴንታ ማኒሳናዋ። 9 ባሬ ናሳ ኑ ጎዳ ዩሱሲ ኪሪስቶሳ ኢቴፔቴላው ሂንቴንታ ዪሴዳ ያሳይ አማኔቴዳዋ።

አማኒያ አሳ ጊደን ሻኮቴላይ ማጴቶፖ

10 ሺን ታናዳን አማኒያዋንቶ፡ ኢቲ ዋዛናኒኔ ኢቲ ቆፋን ኢቲፔ ጊዳናፔ አቲን፡ ሻኮቴላይ ሂንቴ ጊደን ዴዔና ማላ፡ ሂንቴ ኡባይ ኢቲ ሃሳያ ሃሳያናዳን፡ ኑ ጎዳ ዩሱሲ ኪሪስቶሳ ሱንላን ታኒ ሂንቴንታ ዋሳይ። 11 አዪሲ ጎፔ፡ ታናዳን አማኒያዋንቶ፡ ቃሎዓ ሶይ አሳይ ሂንቴንቲባ፡ ሂንቴ ጊደን ዋላሳይ ዴዔያዋ፡ ታው ኦዴዲና። 12 ታኒ ጊያዌ ሃዋ፤ ሂንቴንቲ ሁጲያን ሁጲያን፡ «ታኒ ጳዉሎሳዋ፡ ታኒ አጲሎሳዋ፡ ታኒ ኬፋዋ። * ታኒ ኪሪስቶሳዋ» ያገታ። 13 ኪሪስቶሲ ሻኬቴዴ? ሂንቴንቲ ዲራው፡ ማሰቃሊያ ቦላ ሚሲማሪያን ጴሼቴዴ ካቄቴዳዌ ጳዉሎሴ? ዋይ ሂንቴ ጳዉሎሳሲ ጊዳናው ፃማቄቴዲቲ?

14 ታኒ ቃሪሲጳሳፔኔ ጋዮሳፔ አቲን፡ ሂንቴንቲፔ ኦናኔ ፃማቃቤና ዲራው፡ ያሳ ጋላታይ። 15 ሂዋ ዲራው፡ አኒኔ ሂንቴንታ ታው ጊዳናዳን ፃማቄቴዲታ ጋናው ዳንዳዬና። 16 ቃሲ፡ ኤ፡ ኢሲፂፋኖሳ ሶይ አሳካ ታኒ ፃማቃዲ። ሺን ሃራ ጉጃዴ ፃማቃዲታንቶኔ ዋዛና አላኬ። 17 አዪሲ ጎፔ፡ ኪሪስቶሲ ታና ሚሺራቹዋ ቃላ ኦዳና ማላ ኪቴዳፔ አቲን፡ ፃማቃና ማላ ኪቴቤና፤ ቃሲ ኪሪስቶሲ ማሰቃሊያ ቦላ ሃይቄዳዌ ማላ ጊዴና ማላ፡ ታኒ አሳ አቆዳ ኤራቴላ ቃላን ታማሪሲኬ።

ኪሪስቶሲ ያሳ አቆዳ ኤራኔ ዋልቃ

* 1:12 ኬፋ፡ ሃዌ ግሪኬ ሱንላ ጊዲዴ፡ ቢሌላይ ዛላ ጊያዋ፡ ሃራ ጌሻ ማፃፋቲዋን ኬፋ ሱንላይ ጳጳሮሳ።

18 እዪሲ ጎፔ፣ ኪሪስቶሲ ማስቃሊያ ቦላ ሃይቄዳዎ ኦዲያ ቃላይ ቋዪያዎንቱሲ ኤያቴላ። ሺን ኩሲ ኣቲያዎንቱሲ ያሳ ዎልቃ።
19 ያሳ ማፃፋይ፡

«ታኒ ኤራንቻቱዎ ኣጼዳ ኤራቴላ ባዪዛና፤

ቃሲ ኣኬካንቻቱዎ ኣኬካካ ቋዪሳና» ያጌ። 20 ኣጼዳ ኤራንቻይ ሃቃን ዴዒ? ሂጊያ ታማሪሲያዎ ሃቃን ዴዒ? ዎይ ሃ ኣላሚያ ያናናው ፓሉሜቲያዎንቱ ዋናንዲናሻ? ያሳይ ሃ ሳፃ ኣጼ ኤራቴላይ ኤያቴላ ጊዲያዎ ቤሴዳ!

21 እዪሲ ጎፔ፣ ኣሳይ ባሬ ሁጺ ኣጼ ኤራቴላን ባሬና ያሳ ኤሬና ማላ፣ ያሳይ ባሬ ኣጼ ኤራቴላን ዲጊዴ፣ ኩኒ ኦዲያ ኤያ ቃላን ኣማኒያዎንታ ኣሻናው ቆፔዳ። 22 ኣዪሁዳቱ ማላታ ኦቲኖ። ቃሲ ጊሪኬ ኣሳቱ ኣጼ ኤራቴላ ዎልቃማ ኮሻ ኮዪኖ። 23 ሺን ኩኒ ማስቃሊያ ቦላ ሚሲማሪያን ቋሺቲዴ ካቄቲዳ ኪሪስቶሳባ ኦዴቶ። ሄዎ ኣዪሁዳቱዎሲ ቋቦ፤ ቃሲ ኣዪሁዳ ጊዴናዎንቱሲ ኤያቴላ። 24 ሺን ያሳይ ዪሴዳዎንቱሲ ኣዪሁዳቱሲካ ጊሪካቱሲካ ኩኒ ኦዲያ ያሳ ዎልቃይኔ ኣ ኣጼ ኤራቴላይ ኪሪስቶሳ። 25 እዪሲ ጎፔ፣ ያሳ ኤያቴላይ ኣሳ ኣጼዳ ኤራቴላፔ ኣጼ፤ ቃሲ ኣ ላፋቴላ ጌቴቲያዌካ ኣሳ ሚኖቴላፔ ሚኔ።

26 ሲሚ ታናዳን ኣማኒያዎንቶ፣ ያሳይ ሂንቴንታ ዪሲያ ዎዴ ሂንቴ ዎይሳ ማላ ኣሴንቶ ቆፒቴ። ኣሳ ቆፋን ሂንቴ ጊዲን ኣጼ ኤራንቻቱ፣ ዎልቃማቴኔ ቋቃ ሺሻቱ ዳራ ጊዲኪኖ። 27 ሺን ያሳይ ኣጼዳ ኤራንቻቱዎ ዬላያናው፣ ኣላሚያን ዴዒያ ኤያቱዎ ደሬዳ፤ ቃሲ ሚናቱዎ ዬላያናው፣ ኣላሚያን ዴዒያ ላፋቱዎ ደሬዳ። 28 ያሳይ ሃ ኣላሚያን ዎልቃማባ ጊዴ ቆፒያዎ ቋዪሳናው፣ ሃ ኣላሚያ ማዴናባ ካጼቶባኔ ሃኒቤናባ ደሬዳ። 29 ሄዎ ዲራው፣ ኦኒኔ ያሳ ሲንሳን ጨቄታናው ቤሴና። 30 ሺን ያሳይ ሂንቴንቱሲ ኪሪስቶሲ ዬሱሳ ዴዐዎ ኡዲ ኢሜዳ። ኪሪስቶሲ ኩሲ ኣጼ ኤራቴላ፣ ዪሎቴላ፣ ጌሻቴላኔ ኣቶቴላ ጊዴዳ። 31 ሄዎ ዲራው፣ ያሳ ማፃፋይ፡

«ጨቄቲያ ኡራይ ኦኒኔ ጎዳይ ኦሌዳዎን ጨቄቶ» ያጌ።

1:19 ኢሳ 29:14 1:20 ዮብ 12:17፤ ኢሳ 19:12፤ 33:18፤ 44:25 1:31 ኤርዎ 9:24

2

ኮኒ ኪሪሰቶሳ ካቃባ ማርካቴቶ

1 ታናዳን አማኒያዎንቶ፡ ታኒ ያሳ ቱማቴላ ፀራ * ሂንቴንቲሲ ኦዳናው ሂንቴንቲቱ ዩዳ ዎዴ፡ ጶቃ ቃላኒኔ አጼዳ ኤራቴላን ኦዳናው ያቤይኬ። 2 አዪሲ ጎፔ፡ ታኒ ሂንቴንቲና ዴዒዴ፡ ዩሱሲ ኪሪሰቶሳጎፔኔ ቃሲ ማሰቃሊያ ቦላ ሚሲማሪያን ጂሼቲዴ ኢ ካቄቴዳዋፔ አቲን፡ ሃራባ ኤሪናዳን፡ ታ ቆፋ ቃቻዲ። 3 ታኒ ዳቡራኒኔ ያሻን ዳሮ ኮኮርሳን ሂንቴንቲና ዴዒዲ። 4 ታኒ ታማሪሲያዎኔ ኦዲያዎ ያሳ አያናኒኔ ዎልቃን ቆንጨሳይፔ አቲን፡ ጨማ ጊዲዴ አጼዳ ኤራቴላ ቃላና ጊዴና። 5 ሃዎ ዲራው፡ ሂንቴ አማኑ ያሳ ዎልቃናፔ አቲን፡ አሳ አጼ ኤራቴላን ዜምፒቤና።

ያሳ አጼዳ ኤራ

6 ኮኒ አያናን ዎዛናማቱዎ ጊደን አጼ ኤራቴላ ሃሳዬቶ። ሺን ሃዌካ ሃ አላሚያ አጼ ኤራቴላ ጊዴና፤ ዎይ ሃ አላሚያ ዎዲያ ጳዪያዎንቱ አጼ ኤራቴላ ጊዴና። 7 ሺን ኮኒ ኦዲያ አጼ ኤራቴላይ፡ ያሳይ ካሴቲዴ፡ ጮራ ዎዲያፔ ካሴ ኑ ቦንቹዎሲ ደራዳ አሳፔ ጌሜዳ አ ፀራ አጼ ኤራቴላ። 8 ሃ አላሚያ ዎዲያዎንቱፔ ኦኒኔ ሃ አጼ ኤራቴላ ኤሪቤና። ኡንቱንቱ ኤሪዳዎ ጊዲንቶ፡ ቦንቾ ጎዳ ማሰቃሊያ ቦላ ሚሲማሪያን ጂሼዴ ካቄኪና። 9 ሺን ያሳ ማፃፋይ፡ «ኦኒኔ አይፊያን ቤዒቤናዎ፡ ሃይላንካ ሲሲቤናዎ፡ ቃሲ ኦኒኔ ባሬ ዎዛናን ቆፒቤናዎ

ያሳይ ባሬና ሰቂያዎንቲሲ ጊጊሴዳዎ»

ጊያዎዳን ኮኒ ሃሳዬቶ። 10 ያሳይ ባሬ ፀራ ዩወዎ ባሬ አያናን ኑና ኤሪቤዳ፤ አዪሲ ጎፔ፡ ጌሻ አያናይ ያሳባ ሃራይ አቶ ጌሜዳ ዩወዎ ኡባ ቢዴ። 11 አዪሲ ጎፔ፡ አሳን ዴዒያ አሳ አያናፔ አቲን፡ አሳባ ኤሪያዎ ኦኒ? ሃዎዳንካ፡ ቃሲ ያሳባ ያሳ አያናፔ አቲን፡ ኦኒኔ ኤሪና። 12 ኮኒ ያሳይ ኮሲ አሜዳባ ኡባ ኤራናው ኢ ኮሲ ዩዴዳ አያና አኬዳፔ አቲን፡ አላሚያ አያና አኪቤይኮ።

13 ኮኒ አያና ዩወዎ † አያና ዩወዎና ጋሊዴ፡ ጌሻ አያናይ ኑና ታማሪሴዳ ቃላን ሃዎ ሃሳዬቶፔ አቲን፡ አሳ አጼ ኤራቴላይ ኑና ታማሪሴዳ ቃላን ሃሳዮኮ። 14 ሺን ጌሻ አያናይ ባይና አሳይ ያሳ አያና ዩወዎ አኬና፤ አዪሲ ጎፔ፡ ሃዌ አው ኤያቴላ። ዩወ ጌሻ

* 2:1 ያሳ ቱማቴላ ፀራ፡ አቲ አቲ ጌሻ ማፃፋ ቢሌላቱ፡ ያሳባ ማርካቴላ፡ ያጊና።
 2:9 አሳ 64:4 † 2:13 አያና ዩወዎ፡ ጌሻ አያናይ አሜዳ ቃላ።

አያናን ፓጩቲያ ዲራው፤ ኢ ኤራናው ዳንዳዬና። 15 ሺን ጌሻ አያናይ ዳዒያ አሳይ ኡባባ ሻኬ፤ ሺን ኢ ባሬ ሁጵው ኦናኒኔ ሻኬቲና። 16 አዪሲ ጎፔ፣ ያሳ ማፃፋይ፣

«ጎዳ ዎዛና ኤሪያዌ ኦኔ?
ኢ ዘራናው ዳንዳዪያዌ ኦኔ?»

ያጌ። ሺን ኑሲ ኪሪሰቶሳ ዎዛናይ ዳዔ። †

3

ያሳ ካሊያዎንቱ ኦሱዎ

1 ታናዳን አማኒያዎንቶ፣ ታኒ ጌሻ አያናይ ዳዒያ አሳሲ ሃሳዪያዎዳን፣ ሂንቴንቱሲ ሃሳያናው ዳንዳያቤይኬ። ሺን ሃ አላሚያ አሳሲ ሃሳዪያዎዳኒኔ አማኑዎን ሚኒቤና ኪሪሰቶሳን ዳዒያ ጉላ ናና ማላ አሳሲ ሃሳዪያዎዳን ሃሳያዲ። 2 ሂንቴንቱ ቢሮ ሚና ቁማ ማናው ዳንዳይቤና ዲራው፣ ታኒ ሂንቴንታ ማላ ፓካዲ፤ ሃራይ አቶ፣ ሃዒካ ዳንዳይቤይኪታ። 3 አዪሲ ጎፔ፣ ሂንቴ ሃዒካ ሃ አላሚያ አሳዳን ዳዒታ። ሂንቴንቱ ሃ አላሚያ አሳ ጊዲያዎ ሂንቴ ጊዲን ዳዒያ ቃናቲኔ ፓሉማይ ኤሪሴኔ? ቃሲ ሃ አላሚያ አሳዳን ሲሜሬቲታ። 4 አዪሲ ጎፔ፣ ሂንቴንቱፔ አቲ፣ «ታኒ ጳዉሎሳዎ» ጎፔ፣ ሃራይ ቃሲ፣ «ታኒ አጲሎሳዎ» ጎፔ፣ ሃ አላሚያ አሳ ማላ ጊዲኪቲ?

5 ያቲና፣ አጲሎሲ ኦኔ? ጳዉሎሲ ኦኔ? ኑኒ ሂንቴንታ አማንሌዳ ያሳ ካሊያዎንታ። ያሳይ ኑሲ ሁጲያን ሁጲያን ኢሜዳ ኦሱዎ ኦሌቶ። 6 ታኒ ፑቲያ ቶካዲ፤ አጲሎሲ ሃላ ኡሼዳ፤ ሺን ያሳይ ፑቲያ ዲቺዳ። 7 ሄዎ ዲራው፣ ዲቺያ ያሳፔ አቲን፣ ቶኪያዌካ ሃላ ኡሼያዌካ አያኔ ጊዳና። 8 ቶኪያዌኔ ሃላ ኡሼያዌ አቲ ማላ፤ ሺን ያሳይ ሁጲያን ሁጲያን አ ዳቡራ ኬና አው ዎይታና። 9 ኑኒ ያሳሲ አቲፔ ኦሊያ አ ኦሳንቻቱዎ ጊዲያ ዲራው፣ ሂንቴ አ ኦሱዎ ሳዓ።

ቃሲካ ሂንቴ ያሳ ጎሊያ። 10 ያሳይ ታው ኢሜዳ አጾ ኬካቲላን ኤራንቻ አናጺያዳን፣ ጎሊያ ባሱዎ ባሳዲ። ሃራ ኡራይ አ ቦላ ኬጃ። ሺን አ ቦላ ኬጃያ ኦኒኔ ዎቲ ኬጃንቶ፣ ባሬ ሁጵው ናጌቶ። 11 አዪሲ ጎፔ፣ ያሳይ ዬሱሲ ኪሪሰቶሳ ፃላላ ባሶ ኦሊዳ ዎሌዳ። አፔ ሃራ ባሱዎ ባሳናው ኦኒኔ ዳንዳዬና። 12 ሺን ሃ ባሱዎ ቦላ ኦኒኔ ዎርቃን ጊዲና፣ ቢራን ጊዲና፣ አልዎ ሹቻን ጊዲና፣ ሚላን

† 2:16 ኑሲ ኪሪሰቶሳ ዎዛናይ ዳዔ፣ ሃዎ ጉሳይ፣ ኑኒ ኪሪሰቶሲ ቆፒያዎዳን ቆፔቶ ጉሳ። 2:16 አሳ 40:13

ጊዲና፡ ጋታን ዎይ ማቃን ከዎ፤ 13 አሳ ኡባ ኦሱ ቆንጨያ ከሳናዎ፡ አዪሲ ጎ፤ ታማን ቆንጨና ዲራው፡ ሄ ጋላሳይ አሳ ኡባ ኦሱዎ ቤሳና፡ አሳይ ኡባይ ባሬ ኦሱዎ ዎቲ ኦሴዳንቶኔ ታማይ ፓጫና፡ 14 ኦኒኔ ባሱዎ ቦላ ከዳዳ ኦሱ ሚኒዳ አቶ፤ ኢ ዎይታ አካናዎ፡ 15 ኦ ኦሱኔ ጉዳቶ፤ ሄ ኡራይ ቆሄታና፡ ኢ ባሬ ሁጹው አታና፤ ሺን ታማ ጊዶ፤ ከሲ አኮዋዳን አታና፡

16 ሂንቴንቱ ያሳይ አቁያ ጌሻ ጎሊያ ጊዲያዎኔ ያሳ አያናይ ሂንቴንቱን ዳዲያዎ ኤሪኪቱ? 17 ኦኒኔ ያሳ ጌሻ ጎሊያ ኮሎ፤ ያሳይ አ ኮላና፡ አዪሲ ጎ፤ ያሳይ አቁያ ጌሻ ጎሊ ጌሻ፤ ሄ ጌሻ ጎሊካ ሂንቴንታ፡

18 ኦኒኔ ባሬ ሁጹያ ጨዎ፡ ሂንቴንቱ ኦኒኔ ባሬና ሃ አላሚያን አጶ ኤራንቻ ያጊዳ ቆፖ፤ አጶ ኤራንቻ ጊዳናው፡ ኤያ ጊዶ፡ 19 አዪሲ ጎ፤ ሃ አላሚያ አጶ ኤራቴሳይ ያሳ ሲንላን ኤያቴላ፡ ያሳ ማፃፋይ፡

«ያሳይ አጶ ኤራንቻቱዎ ኡንቴንታ ኡንቴንቱ ጌኒያን ኦይቄ» ያጌ፡ 20 ቃሲ፡

«አጶዳ ኤራንቻቱዎ ቆፋይካ ማዲ ባይናዎ ጊዲያዎ ጎዳይ ኤሬ»

ያጌ፡ 21 ሄዎ ዲራው፡ ኦኒኔ አሳን ጨቁቶ፡ አዪሲ ጎ፤ ኡባባይካ ሂንቴዎ፡ 22 ጳጴሎሲካ፡ አጲሎሲካ፡ ከፋይካ፡ * ሃ አላሚካ፡ ዳዑካ፡ ሃይቁካ፡ ሃዲ ዳዲያዎካ፡ ሲንላ፤ ያናዎክ፡ ኡባይካ ሂንቴዎ፡ 23 ሂንቴንቱ ከሪሰቶሳዎንታ፤ ከሪሰቶሲካ ያሳዎ፡

4

ከሪሰቶሳ ካሊያዎንታ

1 አሳይ ኦና ከሪሰቶሳው ኦሴያዎንቱዳኒኔ ያሳ ጎሊን ዳዲያ ፀራ ናጊያ አሳዳን ቆፖ፡ 2 ያቲዳ ሄ አሳቱ ባሬንቱ ጎዳሲ አማኔቱዳዎንታ ጊዲዳ፡ ቤታናው ኮሼ፡ 3 ሺን ሂንቱ ዎይ ሃራይ ታ ቦላ ፐርዶ፤ አይኔ ጊዳና፡ ሃራይ አቶ፡ ታኒካ ታ ሁጹያን ፐርዲኮ፡ 4 አዪሲ ጎ፤ ታኒ ታ ሁጹያን አያኔካ ኤሪያባይ ባዎ፤ ሺን ታና ሄዎ ያሊሴና፡ ታና ፐርዲያዎ ጎዳ፡ 5 ሄዎ ዲራው፡ ጎዳይ ጶማኒ ጌሜዳባ ፖዑዎ ከሲያዎ፡ ዎዛና ቆፋ ቆንጨሲያዎ

3:19 ኮብ 5:13 3:20 ማዝ 94:11 * 3:22 ኬፋ፡ 1:12 ሃ ሱንላው ዓሬቱዳ ቢሌላና ኢቱዎ፡

ያና ዎዲ ጋካናሲ ኦ ቦላኒኔ ኦናኔ ፒርደፒቴ። ሄ ዎዴ፣ አሳይ ኡባይ ሁጲያን ሁጲያን ያሳፔ ሳባ ዴማናዎ።

6 ታናዳን አማኒያዎንቶ፣ ሂንቴንቴፔ ኦኒኔ ኦቱ ታማሪሲያዎ ሳቢዴ፣ ሃራይ ታማሪሲያዎ ቦሬና ማላ፣ «ያሳ ማፃፋን ፃፊቴዳዎ ቦንቻ» ያገያዎ ሂንቴ ኦናና ታማራና ማላ፣ ሂንቴ ዲራው፣ ታባኔ አጲሎሳባ ሌሚሱዎዳን ኦዳዲ። 7 አዪሲ ጎፔ፣ ሃራቴዎፔ ኔና ኦኔ ጶቁሴዳዌ? ኔኒ ያሳፔ አካቤናባይ ኔው አዬ ዴዲያዌ? ያቴና፣ ኔኒ አኬዳዎ ገደፔ፣ አዪሲ አካቤናዎዳን ጨቁታይ?

8 ሃዲ ሂንቴ ካሌዲታ። ሃዲ ዲሬቴዲታ። ኦኒ ባይናን ሂንቴሬካ ካወቱዲታ። ኦኒካ ሂንቴንቴና ካወታናዳን፣ ሂንቴ ካወቱዲቴንቶ ሎዓ ሺን። 9 አዪሲ ጎፔ፣ ታው ማላቴያዎዳን፣ ኦኒ ሃ ሳዓሲ፣ ኪታንቻቴዎሲኔ አሳሲ ካሳ ገዴዳ ዲራው፣ ያሳይ ኦና ዬሱሲ ኪቴዳዎንታ ሃይቁዎሲ ፒርዴቴዳ አሳዳን፣ ኡባፔ ወርሴሳ አሌዳ።

10 ኦኒ ኪሪሰቶሳ ዲራው ኤያ፣ ሺን ሂንቴ ኪሪሰቶሳን አጲዳ ኤራንቻ። ኦኒ ዳቡራንቻ፣ ሺን ሂንቴ ሚና። ሂንቴንቴ ቦንቹቴዳዎንታ፣ ሺን ኦኒ ቶሼቴዳዎንታ። 11 ሃ ዎዲ ጋካናሲ፣ ኦኒ ኮሻቴቶ፣ ሳማቴቶ፣ ካሎቴቶ፣ ዴሼቴቶ። ቃሲ ዴዲያ ሳዓ ጳዪዴ ዩዬቶ። 12 ኦኒ ኦ ኩሺያን አሊዴ ዳቡሬቶ። ኦና አሳይ ሼቁያ ዎዴ፣ አንጄቶ። ኦና ዬዴርሲ ዩዪያ ዎዴካ ዳንዳዬቶ። 13 ኦ ቦላ ኢታባ ሃሳዪያ ዎዴ፣ ኦኒ ሎዎ ቃላ ዛሬቶ። ኦኒ ሃዎ ጋካናሲካ፣ ሃ ሳዓ ፒቴዎኔ ኡባባ ቡራ ገዴዳ።

14 ታኒ ታ ሲቁያ ናናዳን፣ ሂንቴንታ ሴራናው ሃዎ ፃፋዲፔ አቴን፣ ዬላያናው ፃፋቤይኬ። 15 አዪሲ ጎፔ፣ ኪሪሰቶሳን ሂንቴንታ ዲቺያ ታሙ ሻዓ አሳይ ሂንቴንቴሲ ዴዎፔካ፣ ሂንቴንቴሲ ኦቱ አወዎፔ ሃራይ ባዎ። አዪሲ ጎፔ፣ ታኒ ሚሺራቸዎ ቃላ ሂንቴንቴሲ አሂዳዎዳን፣ ኪሪሰቶሳ ዬሱሳን ሂንቴንቴሲ አወዎ ገዳዲ። 16 ሲሚ ታናዳን ሃኒቴ ያጋዴ ሂንቴንታ ዎሳይ። 17 ሄዎ ዲራው፣ ጎዳን አማኔቴዳ ታ ሲቁያ ታ ናዓ ዒሞቶሳ ሂንቴንቴኮ ኪታዲ። ኢ ኡባ ሳዓን ዴዲያ አማኒያ አሳ ኡባው ታኒ ታማሪሲያ ኪሪሰቶሳ ዬሱሳን ዴዲያ ታ ኦጊያ ሂንቴንታ ሃሳዪሳናዎ።

18 ታኒ ሂንቴንታ ቤዓናው ሂንቴንቴኮ ዬናባ ማላቴና፣ ኦቶሬቴያ ኦቱ አቲ አሳቱ ዴዲያ። 19 ሺን ጎዳይ ጎፔ፣ ታኒ ሂንቴንቴኮ ኤሌካ ባዴ ሄ ኦቶሬቴያ አሳቱዎሲ ሃሳያ ገዴናን፣ ኦንቴንቴ ዎልቃ ኤራና። 20 አዪሲ ጎፔ፣ ያሳ ካወቱላይ ያሳ ዎልቃናፔ አቴን፣ ሃሳያና ገዴና። 21 ታኒ ሂንቴንቴኮ ሙሪያ ፃሞዓና ዮዬ ዎይ ሲቁዎናኔ አሺኬ አያናና ዮ? ሃቃዎ ዶሪቴ?

5

አማኒያ አሳ ጊደን አሴቴዳ ፖኮባ

1 ሂንቴንቴ ጊደን ፖኮ ዎሹማ አሱ ዳዲያዌ ዘገሬቴ፤ ሄዋ ማላ ፖኮ ዎሹማ አሱ ሃራይ አቶ፣ ያሳ አማኔና አሳ ጊደኒኔ ባዎ። አዪሲ ጎፔ፣ ባሬ አዉዋ ማቻቶ አኬዳ አሳይ ዳዴ። 2 ሂንቴንቴካ አቶሬቴዲታ። ሄዋፔ ሂንቴ ካዮታናው ቤሴኔ? ሄዋ ማላ ፖኮ አሱዋ አሴዳ ቢታኒ ሂንቴ ጊደፔ ከቻናው ቤሴ።

3-4 አያ ጊዲናካ ታኒ ታ አሳቴላን ሂንቴንቴና ዳዴናኒ ሳዮፔካ፣ አያናን ሂንቴንቴና ዳዳይ። ሃዲ ሂንቴንቴና ዳዲያዋዳን ሃናዴ፣ ሄዋ ማላ አሱዋ አሴዳ ቢታኒያ ቦላ ኑ ጎዳ ዩሱሲ ከሪሰቶሳ ሱንላን ፐርዳዲጋዲ። ሂንቴንቴኔ ታ አያናይ ኑ ጎዳ ዩሱሲ ከሪሰቶሳ ዋልቃና አቲፔ ሸቂዳ፣ 5 ሄ ቢታኒያ አያናይ ጎዳ ዩሱሲ ፐርዳው ዪያ ጋላሳን አታና ማላ፣ ናጋራን ኩሜዳ አ ቦላ ኮላናዳን ሴፃናሲ ሂንቴ አማናዳን፣ ታኒ ፐርዳዲ።

6 ሂንቴንቴ ጨቁ ሎዓ ጊዳና። ጉላ አርሹ ሙናቃ ኡባ ዳንሊያዋ ኤሪከቴ? 7 ሂንቴንቴ አራላ ጊዳና ማላ፣ ናጋራ አርሹ ጫሌዳዋ ኬሴቴ። ሂንቴንቴ አርሹ ባይና ሙናቃ ማላ። አዪሲ ጎፔ፣ ኑ ፓሲጋ ዶርሳይ፣ ከሪሰቶሲ ያርሼቴዳ። 8 ሄዋ ዲራው፣ ኑኒ ኡከላ ባላ ሱሬቴላኒኔ ቴማቴላን ቦንቻናፔ አቲን፣ ጫላ አርሹዋን፣ ኢታቴላ አርሹዋኒኔ ጌላቴላ አርሹዋን ቦንቻኮ።

9 ዎሹማናው ቆፒያዋንቴና ሂንቴ አቲፔ ጋኬቴና ማላ፣ ሂንቴንቴሲ ዳቢዳቢያ ፃፋዲ። * 10 ታኒ ጊያዌ ሃ አላሚያን ዳዲያ ዎሹማናው ቆፒያዋንቴፔ ዎይ ዮራቲያዋንቴፔ፣ ካዪሶቲያዋንቴፔኔ ዎይ ኤቃው ጎዪኒያዋንቴፔ ኡባካ ሻኬታና ማላ ጊዳና። ሄዋ ጊደፔ፣ ሃ አላሚያፔ ሂንቴ ሻኬቲ ባናው ቤሴ ጉሳ። 11 ሺን አሻቱዋ ሃዲ ጌቴቲያዋንቴፔ አቱኔ ዎሹማናው ቆፒያዋንቴ ዎይ ሚሻው ዮራቲያዋንቴ ዎይ ኤቃው ጎዪኒያዋንቴ ዎይ አሳ ሱንላ ባይዚያዋንቴ ዎይ ማሶቲያዋንቴ ዎይ ዉዲያዋንቴና ሂንቴንቴ አቲፔቴላ አሴና ማላ፣ ታኒ ሂንቴንቴሲ ፃፋዲ። ሄዋንቴ ማላና ሃራይ አቶ፣ ቁማካ አቲፔ ሞፒቴ።

12 አዪሲ ጎፔ፣ ዎሳ ጎሌፔ ካሬና ዳዲያዋንቴ ቦላ ፐርዳናው ታና አዬ ጋሊ? ሂንቴንቴ ጊደን ዎሳ ጎሌን ዳዲያዋንቴ ቦላን

5:1 ዛር 22:30 5:7 ኬሰ 12:5 5:8 ኬሰ 13:7፤ ዛር 16:3 * 5:9 ዳቢዳቢያ ፃፋዲ፣ ሃዋ ፃፋናፔ ካሴና ጳዉሎሲ ቆሮንቶሳ አሳሲ ፃፊዳ ሃራ ቆንጨያን ኤሬቴሴና ዳቢዳቢ ዳዴ ጉሳ።

ሂንቴ ፐርዲኪቴዬ? 13 ሺን ካሬና ዳዲያዎንቱ ቦላን ያሳይ ፐርዳና። ሄ ኢታባ አሊያ ኡራ ሂንቴ ጊደፔ ኬሲዲጊቴ።

6

አማኒያ አሳ ጊደን ዳዲያ ዋላሳ ዎቲዳ ቆዩሳናው ቤሲ?

1 ሂንቴንቲፔ ኢቲ ኡራሲ ባሬ አሻና ሞቱ ዳዲያባ ጊደፔ፣ አማኒያዎንቱ ቦላ ፐርዳታናዎ ባሺዴ፣ አማኒናዎንቱ ቦላ ፐርዳታናው ዋኒ ፃሊዴ ቤ? 2 አማኒያዎንቱ አላሚያ ቦላ ፐርዳናዎ ኤሪኪቴ? ያቲና፣ አላሚያ ቦላ ሂንቴ ፐርዳናዎንታ ጊደፔ፣ ኡባባፔ ጉዲያዎ ፐርዳናው ዳንዳይኪቴ? 3 ሃ ደዑዋባይ አቶ ሺን፣ አማኒያዎንቱ ኪታንቻቱዎ ቦላ ፐርዳናዎ ኤሪኪቴ? 4 ያቲና፣ ሂንቴንታ ሃ አላሚያ ደዑዋባው ፐርዳ ጎሌ ቡሳይ ኮሾፔ፣ አማኒያ አሳይ ካጼዳ አሳን ፐርዲሳናው አፊቴ? 5 ታኒ ሂንቴንታ ዩላያናው ሃዎ ጋይ፣ ሃዎ ጊዳናው ቤሲ? ሂንቴንቲ ጊደን አሻቱዎ ሲገላናው ዳንዳይያ ሎዎ ኤራንቻ አሳይ ኢቱኔ ባዌ? 6 ሺን ኢቲ አሻይ ዮኮ አሻ ፐርዳ ጎሌን ሞቲዴ፣ ሄ ዩወዎ አማኒና አሳን ፐርዲሲ?

7 ሲሚ ኢቲ አቱዎ ሞቲያዌ ሂንቴ ጊደን ዳዎፔ፣ ሄዌ ሂንቴ ኩንዴዳዎ ቤሲ። ሄዎፔ ሂንቴ ናቄቲያዌኔ ጨሚቲያዌ ሎዴኔ?

8 ሺን ሂንቴ ሂንቴ ሁጹው ኢቲ አቱዎ ሃራይ አቶ፣ ሂንቴ አሻቱዋካ ናቄታኔ ጨሚታ።

9 ዎይ ማካላንቻቱ ያሳ ካወቱላ ላቴናዎ ኤሪኪቴ? ባሎፐፔ፣ ዎሹማናው ቆፒያዎንቱ ዎይ ኤቃው ጎዪኒያዎንቱ ዎይ ዎሹሚያዎንቱ ዎይ አቱማዎ ጊዲዴ፣ አቱማዎና ጊሲያዎንቱ፣

10 ዎይ ካዩሳቱ ዎይ ሚሻው ዮራቲያዎንቱ ዎይ ማሉቲያዎንቱ ዎይ አሳ ሱንላ ባይዚያዎንቱ ዎይ ቦንቁያዎንቱ ያሳ ካወቱላ ላቴኪኖ።

11 ሂንቴንቲፔካ ኢቲ ኢቲ አሳይ ሄዎንቱ ማላ። ሺን ጎዳ ዩሱሲ ኪሪሰቶሳ ሱንላኒኔ ኑ ያሳ አያናን ሂንቴ ሜጨፔቲዴ ጌዬዲታ፣ ቃሲ ዲሌዲታ።

ሂንቴንቲ አሳቴላ ያሳ ቦንቹዋሲ ፔሺቲ

12 ኢቲ ኡራይ፣ «ታኒ ኮዬዳባ ኡባ አላናው ዳንዳያይ» ጋና ዳንዳይ። ሺን ኡባይካ ታና ማዴና። ታኒ ኮዬዳባ ኡባ አላናው ዳንዳያይ። ሺን አዬኔካ ታና ሞዴና። 13 ቃይ ሃራይካ፣ «ቁማይ ኡሉዋሳ፣ ኡሉካ ቁማላ» ጌ። ሺን ያሳይ ኡሉዋካ ቁማካ ቆዩሳና። አሳ አሳቴላይ ጎዳ ዩሱሳሳፔ አቲን፣ ዎሹማሳ ጊዴና። ጎዳ

ዩሱሲካ እሳ አሳቴላሳ። 14 ያሳይ ጎዳ ዩሱሳ ሃይቁዋፔ ዳንፊዳ፤ ቃሲ ኑናካ ሃይቁዋፔ ባሬ ዋልቃን ዳንፋና።

15 ሂንቴንቴ አሳቴላይ ኪሪሰቶሳ አሳቴላና ኢቱዋ ጊዲያዋ ሂንቴ ኤሪኪቴ? ያቲና፣ ታኒ ኪሪሰቶሳ አሳቴላና ኢቱዋ ጊዴዳዋ እፋዴ፣ ጫራቲ አሳቴላና ኢቱዋ ኦላናው ቤሲ? ቤሲና! 16 ዋይ ጫራቲና ኢቲፔቴላ ሜጲያ ኡራይ ኢዚና ኢቲ አሳቴላ ጊዲያዋ ኤሪኪቴ? አዩሲ ጎፔ፣ ያሳ ማፃፋይ፣ «ኡንቴንቴ ላዓቲ ኢቲ እሾ ጊዳና» ያጌ። 17 ሺን ጎዳና ኢቲፔቴላ ሜጲያ ኡራይ እያናን አናና ኢቱዋ ጊዴ።

18 ዋሹማፔ ሃኪቴ። ኢቲ ኡራይ ኦሊያ ሃራ ናጋራ ኡባይ አ አሳቴላፔ ካሬና ዳዔ፤ ሺን ዋሹሚያዌ ባሬ ቦላን ናጋራ ኦሌ። 19 ዋይ ሂንቴ ቦላይ ያሳይ ሂንቴንቴሲ ኢሜዳ ሂንቴንቴን ዳዔያ ጌሻ እያናይ አቂያ ጌሻ ጎሊያ ጊዲያዋ ኤሪኪቴ? ቃሲ ሂንቴ ሂንቴ ሁጲያሳ ጊዲኪታ። 20 አዩሲ ጎፔ፣ ያሳይ ሂንቴንታ ጋቲያን ሻሜዳ። ሄዋ ዲራው፣ ሂንቴ አሳቴላን አ ቦንቹቴ።

7

ጌሉዋ አካባሲ እሾቴዳ ኦሻኔ ኢሜቴዳ ዛሩዋ

1 ሂንቴንቴ ታው ፃሬዳ ዩወዋሲ አቱማ አሳይ ማጫወና ቦቹኔንቶ ሎዓ። 2 ሺን ዋሹማ ጋሱዋ ዲራው፣ አቱማ አሳሲ ሁጲያን ሁጲያን ማቻታ ዳዐ። ቃሲ ማጫ አሳሲካ ሁጲያን ሁጲያን አሲናይ ዳዖ።

3 አሲናይ ባሬ ማቻቲው አሲናቴላን ቤሲያባ ኡዶ፤ ቃሲ ሄዋዳን፣ ማቻታካ ባሬ አሲናሲ ማቹቴላን ቤሲያባ ኦሌ። 4 ማቻታ ባሬ አሳቴላሲ ጎዳ ጊዴኩ፤ ሺን ኢዚ አሲናይ ጎዳ። ሃዋዳንካ፣ ቃሲ አሲናይ ባሬ አሳቴላሲ ጎዳ ጊዴና፤ ሺን አ ማቻታ ጎዳ። 5 ሂንቴንቴ ሂንቴ ጊዴን ያሳ ዋሳን ጌንጫናው ሄ ዋዲያሲ ዞሬታን ዲጌታናፔ ኦቲን፣ ኢቱ ኢቱዋ ዲሳፒቴ። ሂንቴንቴ ሂንቴንታ ናጌና ዲራው፣ ሴፃናይ ሂንቴንታ ፓጩናዳን፣ ኢቲፔ ዳዒቴ። 6 ሺን ታኒ ሂንቴንታ ሄዋ ሂንቴ ዶሶዋዳን ሃኒቴ ጋዪፔ ኦቲን፣ አዛዚኩ። 7 ታኒ አሳይ ኡባይ ታናዳን ሃኒንቶ ዶሳይ። ሺን ያሳይ አሳው ሁጲያን ሁጲያን ዲማ ዲማ አዋታ ኢሚ ዋሌዳ፤ ኢቱዋሲ ሃዋዳን፣ ቃሲ ዮኮዋሲ ሄዋዳን ኢሚ ዋሌዳ።

8 ሄዋ ዲራው፣ ታኒ ማቻቶ አኪቤናዋንቴኔ አሲናይ ሃይቆ ማጫዋንቴ ታናዳን ጮ ዳዒኖንቶ፣ ኡንቴንቶ ሎዓ ጋይ። 9 ሺን

አሙዋን ጉዳቲያዎ፤ አኪያዌኔ ጌሊያዌ ሎዓ ገዲያ ዲራው፤ ኡንቱንቱ ባሬንታ ናጋናው ዳንዲያና ጳዮፕ፤ አኪኖኔ ጌሊኖ።

10-11 ማቻታ ባሬ አሲናፕ ሻኬቱ። ሺን ሻኬቶፕኔ ጌሌናን ዴዑ፤ ዎይ ባሬ አሲናና ሲጌቱ። አሲናይካ ባሬ ማቻቶ ዬዶፖ ያጋዴ፤ አኬዳዋንታኔ ጌሌዳዋንታ አዛዛይ። ሺን ሃዋ አዛዚያዌ ጎዳፕ አቲን፤ ታና ገዲኬ።

12 ታኒ ሃራቱዋ ሃዋዳን ጋይ፤ ጎዳ ገዴና። አማኔና ማቻታ ዴዒያ አማኒያ አሳይ ኦኒኔ ዴዎፕ፤ አ ማቻታ አናና ኢቲፕ ዴዒያዎ ኢ ዶሶፕ፤ ኢዘ ዬዶፖ። 13 ቃሲ አማኔና አሲናይ ዴዒያ አማኒያ ማቻታ ዴዎፕ፤ ኢዚ አሲናይ ኢዚና ኢቲፕ ዴዒያዎ ኢዛ ዶሶፕ፤ አፕ ሻኬቱ። 14 አዪሲ ጎፕ፤ አማኔና አሲናይ ባሬ አማኒያ ማቻቲና ዴዒዴ ጌዬዳ። ቃሲ አማኔና ማቻታ ባሬ አማኒያ አሲናና ዴዒዴ ጌያዳ። ሄዌ ባዌንቶ፤ ሂንቱንቱ ናናይ ቱና፤ ሺን ሃዒ ኡንቱንቱ ጌሻ። 15 ሺን አማኔናዌ ሻኬታና ኮዮፕ ሻኬቶ፤ አማኒያ ማቻቶ ገዲና፤ ዎይ አሲና ገዲና፤ ሃዋ ማላ ዬወዋን ቃሼቲኪኖ። አዪሲ ጎፕ፤ ያሳይ ኑና ሳርቱላን ዴዒናው ያሴዳ። 16 አማኒያ ማቻቱ፤ ኔኒ ኔ አሲና አሻኒንቶኔ ኦ ኤሪ? ዎይ አማኒያ አሲናው ኔኒ ኔ ማቻቶ አሻኒንቶኔ ኦ ኤሪ?

የሳይ ሂንቱንታ ኮይር ያሲያ ዎዴ ሂንቱንቱ ዴዒያ ሃናታን ዴዒቲ

17 ገዶፕኔ፤ አሳይ ሁጲያን ሁጲያን ጎዳይ አው አሜዳዋዳኒኔ ቃሲ ያሳይ ባሬና ያሴዳዋዳን ዴዎ። ሄዌ አማኒያ አሳ ኡባ ታኒ ታማሪሴዳ ሂጊያ። 18 ኦኒኔ ቃፃሬቲ ኡቲዴ፤ ያሳ አማኔዳዋ ገዶፕ፤ ባሬ ቃፃራ ማላ ዲጎፖ። ቃሲ ኦኒኔ ቃፃሬቲናን ዴዒዴ፤ ያሳ አማኔዳዋ ገዶፕ ቃፃሬቶፖ። 19 አዪሲ ጎፕ፤ ያሳ አዛዙዋ ናጋናፕ አቲን፤ ቃፃሬቲና ቃፃሬታና ጳዪና አላሊ ባዎ።

20 አሳይ ሁጲያን ሁጲያን ያሳይ ባሬና ያሴያ ዎዴ ዴዒያዋዳን ዴዎ። 21 ያሳይ ኔና ያሴያ ዎዴ ኔኒ አይሌ? አይኔ ባዎ፤ ሺን ኔኒ አይሌቱላፕ ኬሳናው ዳንዳዮፕ ኬሳ። 22 አዪሲ ጎፕ፤ አይሌ ገዲ ኡቲዳ አሳ ጎዳይ ያሶፕ፤ ኢ ጎዳይ አይሌቱላፕ ኬሴዳ አሳ። ሃዋዳንካ፤ አይሌ ገዴና አሳ ኪሪሰቶሲ ያሶፕ፤ ኢ ኪሪሰቶሳ አይሌ። 23 ያሳይ ሂንቱንታ ጋቲያን ሻሜዳ። አሳ አይሌ ገዶፕ። 24 ታናዳን አማኒያዋንቶ፤ አሳይ ሁጲያን ሁጲያን ያሳይ አ ያሴያ ዎዴ ዴዒያ ዴዑዋዳን፤ ያሳና ዴዎ።

ጌሌቲ አኬቲቤናዋንቱባኔ አምዔቱዋባሲ ኦሼቲዳ ኦሻ

25 ዋደራቱዋሲ ጎዳይ ታና አዛዜዳባይ ባዋ። ሺን ታኒ ጎዳሲ አማኔቱዳዋ ጊዳዳ ዲራው። አፔ ማሮቴሳ አኬዳዋዳን፣ ሂንቴንታ ዘራይ። 26 ሲሚ ሃዒ ማቲዋሲ ታው ሃዌ ሎዒ ማላቴ፤ አሳይ ሃዋዳን ሃኒዳ ዳዎፔ ሎዒ። 27 ኔኒ ማቻቶ አካዲጌዳዋ ጊደፔ፣ ኢዞ ዩዳናው ኮዮፓ። ማቻቶ አካቤናዋ ጊደፔ፣ አካናው ኮዮፓ። 28 ሺን ኔኒ ማቻቶ አኮፔ፣ ናጋራ ኦላቤይካ። ዋደራታካ አሲና ጌሎፔ፣ ናጋራ ኦላቤይኩ። ሺን አኬቲያዋንቶኔ ጌሎቲያዋንቶ ኡንቱንቱ ዳዑዋን ዋልቃማ ማቲ ዳዔ። ታኒ ሂንቴንታ ሄ ማቲዋፔ አሻናው ኮያይ።

29 ሺን ታናዳን አማኒያዋንቶ፣ ታኒ ጊያዌ ሃዋ፤ ዋዲ ዉራዳ። ሃዋፔ ሲንላው አኬዳ አሳቱ፣ አኪቤና አሳዳን ሃኒና። 30 ዩኪያዋንቱ ዩኬናዋዳን፣ ናሼቲያዋንቱ ናሼቴናዋዳን፣ ሻሚያዋንቱካ ሻሚዴ አይኔ ባይናዋዳን። 31 ሃ አላሚያ ዳዑዋን ማዴቲያዋንቱ ኡባካ ማዴቴናዋዳን ሃኒና። አዩሲ ጎፔ፣ ሃ አላሚያ ዳዑ አቲያዋ።

32 ሂንቴንቱ ሂርጌናን ዳዒናዋ ታኒ ደሳይ። አኪቤናዌ ጎዳ ናሼቻናው ኮዩያ ዲራው፣ አ ኦሱዋባ ቆፔ። 33 ሺን አኬዳዌ ባሬ ማቻቶ ናሼቻናው ኮዩያ ዲራው፣ ሳዒባ ቆፔ። 34 አ ቆፋይ ሻኬቴዳ። አሲና ጌላቤና ዋደራታ ባሬ አሹዋኒኔ ባሬ ሸምፑዋን ጌያናው ኮዩያ ዲራው፣ ጎዳ ኦሱዋባ ቆፓው። ሺን አሲና ጌሎዳዉና ባሬ አሲና ናሼቻናው ኮዩያ ዲራው፣ ሳዒባ ቆፓው።

35 ታኒ ሃዋ ሂንቴንታ ማዳና ማላ ጋዩፔ አቲን፣ ሂንቴንታ ጱባናው ጊኬ። ሺን ሂንቴ ቤሲያዋዳን ዳዒዳ፣ ጎዳ ኦሱዋ ሂንቴና አሚዴ አላና ማላ ኮያይ።

36 ኦኒኔ ባሬ ጊጊሴዳ ዋደራቶ አኪያ ዋዲ ጋኪና፣ ባሬና ናጋናው አው ዳንዳዩቴናን ኢዎፔ፣ ኢዞ አኮ። ኢ ኢዞ አኮፔ፣ ሄዋን ናጋራይ ባዋ። 37 ሺን ኢ ባሬ ዋዛናን ሚኖፔ፣ አኬናን ጋሚናና ዳንዳይ። ቃሲ ባሬና ናጊዴ፣ ባሬ ጊጊሴዳ ዋደራቶ አኬናን ጋሚናና ጎፔ፣ ኦኒኔ ዋልቃንሌናን ባሬ ዋዛናን ቆፋ ቃቼዳዋ ጊደፔ ሎይሌዳ። 38 ሄዋ ዲራው፣ ዋደራቶ አኪያ ኡራይ ሎይሌዳ፣ ቃሲ አኬናዌ ኡባ አሏ ሎይሌዳ።

39 አሲና ጌሎዳ ሚሺራታ ባሬ አሲናይ ዳዔዳ ኬናን አናና ኢቴፔ ዳዒናዳን ቃሼታ ኡታዱ። ሺን ኢ ሃይቆፔ፣ ጎዳ አማኒያ አሳ ኦናኔ ጊደፔ፣ ባሬ ደሴዳ አሲና ጌላናው ዳንዳያው። 40 ታ ቆፋ ጊደፔ፣ ጌሎናን ዳዒንቶ፣ ኢዞ ናሼቻን ዳዒና። ቃሲ ታናን ያሳ አያናይ ዳዒያዋ ታኒ ኤራይ።

8

ኤቃሲ ያርሼቴዳ ቁማባ

1 ኤቃሲ ያርሼዳ ቁማባ ገደፔ፣ ኮኒ ኡባይካ ኤሬቶ። ኤራይ ኦቶርሴ፤ ሺን ሲቁ አማኑዋን ዲቼ። 2 ኦኒኔ ባሬው ኢቲባ ኤሪያዎ ማላቶ፣ ኢ ቢሮ ኤራናው ቤሲያዎ ኤሪቤና። 3 ሺን ኦኒኔ ያሳ ሲቆፔ፣ ያሳይ ኦ ኤሬ።

4 ሄዎ ዲራው፣ ኤቃው ያርሼዳ ቁማ ሙሳባ ገደፔ፣ ኤቃ ኡባይ አላሚያን አያኔ ገደናዎኔ፣ ኢቲ ያሳፔ አቲን፣ ሃራይ ባይናዎ ኮኒ ኤሬቶ። 5 አዪሲ ጎፔ፣ ጮራ ያሳቱኔ ጮራ ጎዳቱ ዳዒና። ሺን ሃራይ አቶ፣ ሳሉዋን ገዲና ሳዓን ገዲና፣ ያሳቱዎ ጌቱቲያዋንቱ ዳዎፔካ፣ 6 ኡባባ ሜዴዳዌ ኮኒ አው ዳዒያዌ፣ ኢቲ ያሳይ፣ አው፣ ኑሲ ዳዒ። ቃሲ ኡባባይ ኦኒ ሜዴቱዳዌኔ ኮኒ ኦኒ ዳዒያዌ ኢቲ ጎዳይ፣ ዩሱሲ ኪሪሰቶሲካ ኑሲ ዳዒ።

7 ሺን ሃ ኤራይ አሳ ኡባው ዳዒና። ኢቲ ኢቲ አሳቱ ኤቃ ደዩዳ ዲራው፣ ሃዒ ጋካናዉካ፣ «ኤቃው ያርሼዳ ቁማ» ያገደ ሚና። ቃሲ ኡንቱንቱ ዎዛናይ ሹጋ ገደዳዋን፣ ኡንቱንቶ ሃ ቁማን ቱኔዳዎ ማላፔ። 8 ሺን ቁማይ ኮና ያሳኮ ሺቃናዳን ማዳና። ኮኒ ማና ቆዩንቶካ ኑሲ አይኔ ፓጩና፤ ሞፔኔ ኑሲ አይኔ ጉጃፔና።

9 ሺን ሃዌ ሂንቱ ሂንቱ ደሶዋዳን ሃኒያዌ ሹጎ አማኑዋና ዳዒያዋንታ ናጋራን ዩጌና ማላ ናጌቲቱ። 10 አዪሲ ጎፔ፣ ኔኒ ኤራንቻይ ኤቃው ያርሼዳ ቁማ ማናው ኤቃ ጎሊያን ኡቲዳ ዎዳ፣ ሹጎ አማኑዋና ዳዒያ ኢቲ አሳይ ኔና ቤዎፔ፣ ኤቃው ያርሼዳ ቁማ ኢ ማናው አ ዎዛናይ ቆፔኔዬ? 11 ሄዎ ገደፔ ሃ ሹጎ አማኑዋና ዳዒያ ኔ ኢሻይ፣ ኪሪሰቶሲ አ ዲራው ሃይቁዳዌ፣ ኔ ኤራን ባዬ። 12 ሃዎዳንካ፣ ሂንቱ ሂንቱ ኢሻቱዎ ናቂያዋንኔ ኡንቱንቱ ሹጎ ዎዛና ማይሊያዋን ኪሪሰቶሳ ናቂታ። 13 ሄዎ ዲራው፣ ቁማይ አማኒያ ታ ኢሻ ቆቢያዎ ገደፔ፣ አ ቆቤና ማላ፣ ታ ዳዒያ ላይላን ሙሉካ አሹዎ ሚኬ።

9

ዩሱሲ ኪቲዳዋንቱሲ ዳዒያ ማታኔ ኡንቱንቱ ኦላናው ቤሲያባ

1 ታኒ አይሌቲላይ ባይና አሳ ገዲኪታ? ዩሱሲ ኪቲዳዎ ገዲኪታ? ኑ ጎዳ ዩሱሲ ኪሪሰቶሳ ቤዓቤይኪታ? ሂንቱንቱ ታኒ ጎዳሲ ኦፊዳ ታ ኦሱዎፔ ቤቲዳዋንታ ገዲኪቲዬ? 2 ታኒ ሃራንቱሲ ዩሱሲ ኪቲዳዎ ገዲና ቆዩፔካ፣ ሂንቱንቶ ዩሱሲ

ከቴዳዎ ጊዲያዌ ኤሬቴዳዎ፤ አዩሲ ጎፔ፣ ታኒ ጎዳን ዩሱሲ ከቴዳዎ ጊዲያዎ ሂንቱ ማርካ።

3 ታና ቦሪያዎንቱሲ ታኒ አሚያ ዛሩ ሃዎ። 4 ማናውኔ ኡሻናው ኑሲ ማቲ ባዌ? 5 ዩሱሲ ከቴዳ ሃራቱዋዳኒኔ ጎዳ እሻቱዋዳን፣ ቃሲ ጳዲሮሳዋዳን፣ ኤኖ ጊያ ማቻቶ አቲፔ አኪዴ ባናው ኑሲ ማታይ ባዌ? 6 ዎይ ኑ ዴቦዋሲ ኦሊዴ ባጻታናው ቤሲያዌ ታናኔ ባርናባሳ ፃላሌ? 7 አይ ዎዴኔ ባሬ ሚሻ ሚዴ፣ ዎታዳራቴላ ኦሊያዌ ኦኔ? ዎይ ዎዩኒያ ቱራ ቶኪዴ፣ አ አይፊያ ሚናዌ ኦኔ? ዎይ ሚዛ ዉዲያ ሄሚዴ፣ ሄ ሚዛ ዉዲያፔ ማላ ኡሽናዌ ኦኔ?

8 ታኒ ሃዎ አሳ ቆፋ ፃላላን ጋይታ? ዎይ ሂጊ ቃሲ ሃዎ ጌኔ? 9 አዩሲ ጎፔ፣ ሙሴ ሂጊያን፣ «ካላ ዩዲያ ማህያ ዶና ቃቸፓ» ጌቲቲዴ ፃፊቴዳ። ያሳይ ማህያባ ቆፒዴ ሃዎ ጊ? 10 ዎይ ኢ ሄዎ ጊያዌ ሙሊካ ኑ ዲራሳ ጊዴኔ? ቱማካ ኑ ዲራው ፃፊቴዳ፤ ጎሺያ ቢታኒካ ካላ ቡኪያ ቢታኒካ፣ «ታና ጋኪያዎ አካና» ያጊዴ ኦላናው ቤሴ። 11 ኑኒ ሂንቱ ጊደን አያና ዩዉዎ ዜሬዳዎንታ ጊዲዴ፣ ኑ አሹዋሲ ማዶ ጊዲያዎ ሂንቱንቱፔ ጫኮፔ ዳርቤ? 12 ሃራቱ ሄዎ ሂንቱንቱፔ አካናው ኡንቱንቶ ማታይ ዴፖፔ፣ ኑሲ ኡንቱንቱዋፔ አዲያ ማታይ ባዌ?

ሺን ኑኒ ከሪሰቶሳ ሚሺራቸዎ ቃላሲ ቆቦ ጊዴናዳን፣ ኡባባ ጌንጨያዎፔ አቲን፣ ሄ ማታን ጎዔቲቤይኮ። 13 ጌሻ ጎሊያን ኦሊያ አሳቱ ባሬንቱ ቁማ ጌሻ ጎሊያፔ አኪያዎ ኤሪኪቱ? ቃሲ ያርሺያሳን ኦሊያዎንቱ ያርሹዋፔ አኪያዎ ኤሪኪቱ? 14 ሃዎዳንካ፣ ቃሲ ሚሺራቸዎ ቃላ ኦሊያዎንቱ ባሬንቱ ዴቦዋሲ ኮሺያባ አፔ ዴማናዳን፣ ጎዳይ አዛዜዳ።

15 ሺን ታኒ ሃ ማታ ኡባን አይኔ ጎዔታቤይኬ። ታኒ ሃዎ ፃፊዳዌ ሄዎ ማላ ማታይ ታው ዴፃናው ቤሴ ያጊያዎና ጊዴና። አዩሲ ጎፔ፣ ታ ጩቁዎ ኦኒኔ ማላ ኬሲያዎፔ ሃይቂያዌ ታው ሎዓ። 16 ሚሺራቸዎ ቃላ ኦዳናው ታኒ አዛዜታ ኡቴዳ ዲራው፣ አ አዶፔካ ታው ጩቁቲያባይ ባዎ። ሚሺራቸዎ ቃላ ኦዳናን አጎፔ፣ ታው አዩሮ። 17 አዩሲ ጎፔ፣ ታኒ ሃዎ ደሳዴ አሶፔ፣ ታው ዎይታይ ዴዔ። ሺን ታኒ ዶሴናን ኢያፔካ፣ ሚሺራቸዎ ቃላ ዲራው ሃዳራ ያሳይ ታው አሚዴ። 18 ያቲና፣ ታ ዎይታይ አዬ? ሚሺራቸዎ ቃላ ኦዳዴ፣ ታው ዎንጋላን ዴዒያ ኩሚንላ ማታን ጎዔቲናን፣ ሚሺራቸዎ ቃላ ጮ ኦሊያዎ።

19 ታኒ ኦሲኔ ኣይሌ ጊዲኬ ሺን፣ ጮራቱዋ ዛራናው ታና ኡባው ኣይሌ ኬሳዲ። 20 ታኒ ኣዪሁዳቱዋ ዛራናው ኡንቱንቱና ኡንቱንታ ጊዳዴ ዴዳዲ። ታ ሁጴው ሂጊያፔ ጋርሳና ዴዲኬ። ሺን ሂጊያፔ ጋርሳና ዴዲያዋንታ ዛራናው ሂጊያፔ ጋርሳና ዴዲያ ኣሳ ማላ ጊዳዲ። 21 ታኒ ሂጊ ባይና ኣሳቱዋና ዴዳዴ፣ ሂጊ ባይና ኣሳዳን ሃናዲ። ያሳ ሂጊ ቆዩና ጊዴና። ሺን ሂጊ ባይናዋንታ ዛራናው፣ ኪሪሰቶሳ ሂጊያፔ ጋርሳና ዴዳዲ። 22 ታኒ ኣማኑዋን ዳቡሪያዋንታ ዛራናው፣ ኡንቱንቱ ማላ ጊዳዲ። ታኒ ኣይ ኦጊያኒኔ ኣማራዳ ኣሳቱዋ ኣሻናው፣ ኡባ ኣሳቱዋና ኡባባኒ ኡንቱንቱ ማላ ጊዳዲ። 23 ታኒ ሚሺራቱዋ ቃላ ኣንጂዋ ሻካናው፣ ሚሺራቱዋ ቃላ ዲራው፣ ኡባባ ኦሳይ።

24 ዋሳን ያናና ጊዴ ዋዲያ ኡባይ ኢቲፔ ዋዴ። ሺን ኢቲዋ ፃላላይ ዋይታ ኣኪያዋ ኤሪኪቲ? ሃዋዳን ሂንቲንቱካ ዋይታ ኣካናው ዋዴቲ። 25 ካሳው ባሪና ገጊሲያ ኦኒኔ ኡባባኒ ባሪና ናጌ። ኣሳይ ሄዋ ዳቡሪያዋ ያኔዳዋ ኢማቲያ ባዪያ ኣክሊሊያ ዴማናሳ። ሺን ኦኒ ዳቡሪያዋ ማዲናው ዴዲያዋኔ ባዬና ኣክሊሊያ ዴማናሳ። 26 ሄዋ ዲራው፣ ታኒ ቆፊ ባይናን ዋዲያዋዳን ዋዴኬ። ጮርኩዋ ዪምፒያ ኣሳዳንካ ጮ ኦሌቲኬ። 27 ሺን ታኒ ሃራንቶ ኦዴዳዋፔ ጉዪያን፣ ታ ሁጴው ዋይታፔ ኣቲና ማላ፣ ታ ኣሳቲላ ናጌታናዳን ኦሳይ።

10

ኤቃው ጎዪናናው ቤሴና

1 ሄዋ ቦላን ታናዳን ኣማኒያዋንቶ፣ ታኒ ሂንቲ ሃዋ ኤራና ማላ ኮያይ። ኑ ኣዋቱ ኡባይ ሻሪያፔ ጋርሳና ዴዴዲና፤ ኡባይካ ኣባ ጊዳና ፒኔዲና። 2 ኡንቱንቱ ኡባይ ሙሴና ኢቲፔ ጊዳናው፣ ሻሪያኒኔ ኣባን ፃማቄቲዲና። 3 ኡንቱንቱ ኡባይ ሄ ኢቲ ኣያና ቁማ ማዲና። 4 ቃሲ ኡባይካ ሄ ኢቲ ኣያና ኡሻ ኡሹዲና። ኣዪሲ ጎፔ፣ ኡንቱንቱ ባሬንታ ካሌሊያ ኣያና ዛላፔ ፑልቶዋ ኡሹዲና፤ ሄ ዛላይካ ኪሪሰቶሳ። 5 ሺን ያሳይ ኡንቱንቱፔ ዳሪያ ባጋቱዋን ናሹቲቤና ዲራው፣ ኡንቱንቱ ኣኃይ ኣሳይ ባይና ሳን ላሌቲዳ።

6 ኡንቱንቱ ኢታባ ኣሞቲዳዋዳን፣ ኑ ዋዛናይ ቃሲ ኢታባ ኣሙዋፔ ናጌታናዳን፣ ሄዋ ኡባይ ኑሲ ቲማርቲ ጊዴዳ። 7 ያሳ ማፃፋይ፣ «ኣሳይ ማናዉኔ ኡሻናው ኡቲዲና፤ ቃሲ ዲር ዴንዲ

10:1 ኬስ 13:21-22፤ 14:22-29 10:3 ኬስ 16:35 10:4 ኬስ 17:6፤
 ፓይ 20:11 10:5 ፓይ 14:29-30 10:6 ፓይ 11:4

ኤቄዲኖ» ያጊያዋዳን፣ ኡንቲንቲፔ ኢቲ ኢቲ ኤቃው ጎዪኔዳዋዳን፣ ሂንቲ ጎዪኖፒቲ። 8 ኡንቲንቲፔ ኢቲ ኢቲ ዋሹሜዳዋዳን፣ ኩኒ ዋሹማናው ቤሴና። ሃዋ ጋሱዋን ኡንቲንቲፔ ኢቲ ጋላሲ ላታማኔ ሄዙ ሻዓይ ሃይቄዳ። 9 ኡንቲንቲፔ ኢቲ ኢቲ ጎዳ ፓጪዴ፣ ሾሻን ዲኬቲ ሃይቄዳዋዳን፣ ኩኒ ጎዳ ፓጪናው ቤሴና። 10 ኡንቲንቲፔ ኢቲ ኢቲ ዙዙሚና፣ ዋዲያ ኪታንቻን ኡንቲንታ ዳዪሴዳዋዳን ዙዙሞፒቲ።

11 ሃዌ ኡባይ ሃራቲሲ ቲሚርቲ ጊዳናዳን ኡንቲንቲ ቦላ ጋኬዳ። ቃሲ ኑና ዋዲያ ዉርሴላይ ጋካና ማቲዳዋንታ ሴራናው ፃፌቲዳ።

12 ሃዋ ዲራው፣ ሚና ኤቃዲ ጊዴ ቆፒያ ኡራይ ኦኒኔ ኩንዴናዳን፣ ባሬና ናን። 13 ሂንቲንታ ጋኪያ ፓጪ፣ ኣሳ ኡባ ጋኪያ ፓጪያ ማላፔ ኣቲን፣ ኣይኔ ዲማቲና። ሂንቲንቲ ዋልቃይ ዳንዳዪያዋፕ ኣዲያ ፓጪያን ሂንቲ ፓጪታናው ኮዬና ያሳይ ኣማኔቲዳዋ። ሺን ሂንቲንታ ፓጪ ጋኪያ ዋዴ፣ ሄ ፓጪያ ኢ ሂንቲንታ ዳንዳዪሳና። ቃሲ ሄ ፓጪያፔ ሂንቲንቲ ኬሲያ ኦጊያካ ኢ ኣማና።

14 ሃዋ ዲራው፣ ታ ደሲያዋንቶ፣ ኤቃው ጎዪኖፒቲ። 15 ሂንቲንቲ ዋዛናማ ኣሳ ጊዴዳ ዲራው፣ ታኒ ሂንቲንቶ ኦዳይ። ታኒ ጊያዋ ሂንቲ ፒርዲቲ። 16 ኩኒ ያሳ ጋላቲዴ ሻኪያ ኣንጂዋ ፀዓይ ኪሪሰቶሳ ሱላና ኢቲፔቲላይ ዴዒያዋ ጊዴኔ? ቃሲ ኩኒ ሚንሊያ ኡኪላይ ኪሪሰቶሳ ኣሹዋና ኢቲፔቲላይ ዴዒያዋ ጊዴኔ? 17 ኢቲ ኡኪላይ ዴዒያ ዲራው፣ ኩኒ ጮራ ጊደፔካ፣ ኢቲ ኣሳቲላ። ኣዪሲ ጎፔ፣ ኩኒ ኡባይካ ሄ ኢቲ ኡኪላ ሻኬቲቶ።

18 ኢሰራዔሊያ ኣሳ ጭላቲ። ያርሹዋ ሚያዋንቲ ያርሺያሳና ኢቲፔቲላይ ዴዒያዋንታ ጊዲኪኖ? 19 ሲሚ ታኒ ዋጋይታ? ኤቃሲ ያርሹቲዳ ቁማይ ማዲ ዋይ ኤቃይ ማዲ? 20 ማዴና፤ ሺን ታኒ ጊያዌ ያሳ ኣማኔና ኣሳቲ ኢታ ኣያናቲዋሲ ያርሺያዋፕ ኣቲን፣ ያሳው ያርሺኪኖ። ኢታ ኣያናቲዋና ሂንቲ ኢቲፔ ዙፔታና ማላ፣ ታኒ ኮዪኬ። 21 ጎዳ ፀዓፔ ኡሺዴ ቃሲ ኢታ ኣያናቲዋ ፀዓፔ ኡሻናው ሂንቲ ዳንዳዪኪታ። ጎዳ ጋይታፔ ሂንቲ ጊሹቲዴ ቃሲ ኢታ ኣያናቲዋ ጋይታፔ ማናው ዳንዳዪኪታ። 22 ሃዋ ኡዲዴ ኩኒ ጎዳና ጊኖታናው ኮሺ? ኩኒ ኣፔ ሚኔቶ?

10:7 ኬስ 32:6 10:8 ፓይ 25:1-18 10:10 ፓይ 16:41-49 10:18 ዋግ 7:6 10:20 ዛር 32:17 10:22 ዛር 32:21

23 ሂንቴፔ ኢቱ ኢቱ፣ «ኡባባ ኦላናው ታና ዲጊያባይ ባዋ»፤ ሺን ኡባባይ ማዳና። «ኡባባ ኦላናው ዲጊያባይ ባዋ፤ ሺን ኡባባይ ጌሼና» ያገና። 24 ኦኒኔ ሃራ ኣሳ ማዲያባ ቆፖፔ ኣቲን፣ ሃራይ ኣቶ ኢቱኔ ባሬና ማዲያባ ቆፖፖ።

25 ጌያን ኣፃሬ ታራን ዛሊዔቲያ ኣሹዋ ሂንቴ ዎዛና ቆፋን፣ ኣይኔ ሲጴናን ማቲ። 26 ኣዪሲ ጎፔ፣ ኣላሚኔ ኣኒ ዳዒያባይ ኡባይ ጎዳባ።

27 ኢቲ ኣማኔና ኣሳይ ሂንቴንታ ኢማላ ኡዲ ሸባናው ፃሲና ባናው ኮዮፔ፣ ሂንቴ ዎዛና ቆፋን፣ ኣይኔ ሲጴናን ሂንቴ ሲንሳ ኢ ኣሊያባ ኡባ ማቲ። 28 ሺን ኢቲ ኡራይ ሂንቴንቶ፣ «ሃዌ ኤቃው ያርሼዳዋ» ጎፔ፣ ሄ ሂንቴንቶ ኦዳዳ ቢታኒያ ዲራወኔ ቃሲ ሂንቴ ዎዛና ቆፋ ዲራው፣ ሄ ቁማ ሞፒፔ። 29 ታኒ ጊያዌ ኔ ዎዛና ቆፋ ዲራሳ ጊዳና፤ ሺን ዮኮ ቢታኒያ ዎዛና ቆፋ ዲራሳ።

ታኒ ታ ሃናናው ዳንዳዪያ ታ ሃናታ ሃራ ኣሳ ዎዛናይ ኣያው ፒርዲ? 30 ታኒ ያሳ ጋላታዳ ቁማ ሞፔ፣ ያሳ ጋላታዳ ሜዳ ቁማው ኣያው ቦሬታይታ?

31 ሲሚ ሂንቴ ኣያኔ ሞፔ፣ ዎይ ኣያኔ ኡሾፔ፣ ዎይ ሂንቴ ኣያኔ ኡዶፔ፣ ኡባባ ያሳ ቦንቹዋሲ ኦሊቲ። 32 ሂንቴንቲ ኣዪሁዳ ኣሳቱዋሲ ዎይ ጊሪኬ ኣሳቱዋሲ ዎይ ያሳ ኣማኒያዋንቴሲ ቆቦ ጊዶፒፔ። 33 ታኒ ቃሲ ጮራቲ ኣታና ማላ፣ ኡንቴንቲ ኡባ ማዳናዳኒፔ ኣቲን፣ ታ ሁጳው ማዲዋ ኮዬናን፣ ኣሳ ኡባ ኡባባኒ ናሹቹያዋዳን፣ ሂንቴንቲካ ሄዋዳ ኡዲቲ።

11

1 ታኒ ኪሪሰቶሳ ለሚሱዋ ካሊያዋዳን፣ ሂንቴንቲካ ታዋ ካሊቲ።

ኣሳይ ኢቲፔ ዎሲያ ዎይ ዳዳናው ቤሲያ ዎጋ

2 ታናዳን ኣማኒያዋንቶ፣ ሂንቴ ኡባባኒ ታና ሃሳዪያ ዲራወኔ፣ ዎጋ ታኒ ሂንቴንቶ ኢሜዳዋዳን፣ ሂንቴ ሚኒሲዴ ናጊያ ዲራው፣ ሂንቴንታ ጋላታይ። 3 ሺን ኪሪሰቶሲ ኣቱማዋ ኡባው ሁጳ ጊዲያዋ፣ ኣቱማ ኣሳይ ማጫ ኣሳሲ ሁጳ ጊዲያዋኔ ቃሲ ያሳይ ኪሪሰቶሳሲ ሁጳ ጊዲያዋ ሂንቴ ኤራና ማላ ኮያይ። 4 ያሳ ዎሲዳ፣ ዎይ ቲምቢቲያ ኦዲዳ፣ ባሬ ሁጳያ ጎዚያ ኣቱማ ኣሳይ ኡባይ ኪሪሰቶሳ ቶቹ። 5 ቃሲ ያሳ ዎሳዳ ዎይ ቲምቢቲያ ኦዲዳ።

10:26 ማዝ 24:1

ባሬ ሁጲያ ጎዜና ማጫወና ባሬ አሲና ቶቻው፤ አያው ጎፔ፣ ኢዛ ባሬ ሁጲያ ሜዳታዲጎና ኢቲ ማላ።

6 ማጫወና ባሬ ሁጲያ ጎዛና ቆዮፔ፣ ቃንዲሱ። ሺን ኢዛ ባሬ ሁጲያ ቃንዲሳናዌ ዎይ ሜዲሳናዌ ፖኮፔ፣ ባሬ ሁጲያ ጎዙ። 7 አቱማዌ ያሳ ሌሚሱዋኔ ቦንቹዋ ጊዲያ ዲራው፣ ባሬ ሁጲያ ጎዛናው ቤሴና፤ ሺን ማጫወና አቱማዋሲ ቦንቹ። 8 አዩሲ ጎፔ፣ ማጫወና አቱማዋፔ ቤታዲፔ አቲን፣ አቱማዌ ማጫወኒፔ ቤቲቤና። 9 አዩሲ ጎፔ፣ ማጫወና አቱማዋ ዲራው ሜዳታዲፔ አቲን፣ አቱማዌ ማጫወኒ ዲራው ሜዳቲቤና። 10 ሄዋ ዲራው፣ ማጫወና ባሬ አሲና አዩሱዋፔ ጋርሳና ዳዲያዋ ኤሪሳናወኔ ኪታንቻቱዋ ዲራው፣ ኢዚ ሁጲያን ጎዚያባይ ዳዳናው ቤሴ።

11 ሺን ጎዳን ማጫወና አቱማዌ ባይናን ዳዑኩ፤ አቱማዌካ ማጫወና ባይናን ዳዒና። 12 አዩሲ ጎፔ፣ ማጫወና አቱማዋፔ ሜዳቲዳዋዲን፣ ቃሲ አቱማዌካ ማጫወኒፔ ዬሌቴዳ። ቃሲ ኡባባይካ ያሳፔ ዬ።

13 ሂንቴንቱ ሂንቴ ሁጲው ፒርዲቴ። ማጫወና ባሬ ሁጲያ ጎዜናን ያሳ ዎሳናው ቤሲ? 14-15 አቱማዌ ባሬ ሁጲያ ዲቾፔ፣ አው ፖኮ። ሺን ማጫወና ባሬ ሁጲያ ዲቾፔ፣ ኢዚው ቦንቾ ጊዲያዋ ሃራይ አቶ፣ ሜዳቲንቶኔ ሂንቴንታ ታማሪሴኔ? አዩሲ ጎፔ፣ ማጫወኒ ሁጲ ኢዘ ካማናው ኢዚው ኢሜቴዳ። 16 ሺን ኦኒኔ ሃ ዬወዋን ፓሉሜታናው ኮዮፔ፣ ኑሲ ጊዲና ዎይ ያሳ አማኒያዋንቶ ጊዲናካ፣ ሃዋፔ ሃራ ዎጋይ ባዋ።

ጎዳ ካወዋ አኪያ ዎጋ

(ማት 26:26-29፤ ማር 14:22-25፤ ሉቅ 22:14-20)

17 ሂንቴ ሺቂያዌ ኢታባሳፔ አቲን፣ ሎዎባሳ ጊዴና ዲራው፣ ታኒ ሃ አዛዙዋ ኢማዳ ሂንቴንታ ጋላቲከ። 18 ሺን ሂንቴ ዎሳ ጎሌን ሺቂያ ዎዳ፣ ሂንቴ ጊዲን ጳልቆሳይ ዳዲያዋ ታኒ ሲሳይ። ቃሲ ሄዌ አቲ ባጋና ቱማ ጊዲያዋ አማናይ። 19 አዩሲ ጎፔ፣ ሂንቴ ማታን አማኔቴዳዋንቱ ቆንጩ ኤሬታና ማላ፣ ሂንቴ ጊዲኒካ ቃሲ ሻኩ ዳዳናው ቤሴ። 20 ሄዋ ዲራው፣ ሂንቴ አቲፔ ሺቂያ ዎዳ፣ ሂንቴ ሺቆ ጎዳ ካወዋ ማናሳ ጊዴና። 21 አዩሲ ጎፔ፣ ሂንቴ ቁማ ሚያ ዎዳ፣ ኡባይ ሁጲያን ሁጲያን ባሬዋ ባሬዋ ሚያ ዲራው፣ አቱ ኮሻቴ፤ አቱ ቃሲ ማሶቴ። 22 ማናወኔ ኡሻናው ሂንቴንቶ ጎሊ ባዌ? ዎይ ያሳ ዎሳ ጎሊያ ካጂቴ? ቃሲ አይኔ ባይናዋንታ

ዬላዩቲ? ታኒ ሂንቴንታ ዋጎ? ሃ ዬወዋን ታኒ ሂንቴንታ ጋላቶ? ጋላቲኬ።

23 አዪሲ ጎፔ፣ ታኒ ቃሲ ሂንቴንቶ ኢሜዳ ቲሚርቲያ ጎዳፔ አካዲ። ጎዳ ዬሱሲ ኡንቴንቲ አ አሊዴ ኢሜዳ ቃማ ዳቡዋ አኪዴ። 24 ያሳ ጋላቲዳ፤ ዳቡዋ ማንሲዴ፣ «ሃይቲ፤ ሚቲ። ሃዌ ሂንቴ ጊሻታው ባሬና ኢሜዳ ታ አሹዋ። ሃዋን ታና ቆፒቲ» ያጌዳ። 25 ሃዋዳንካ፣ ካወዋ ሚዴ ሲሚና፣ ፀዓ ቃሲ አኪዴ፣ «ሃዌ ፀዓይ ታ ሱላን ታኒ ጫቄዳ ኦራላ ጫቁዋ። ሂንቴንቲ አፔ ኡሹዳ ዋዴ ኡባን ሄዋን ታና ቆፒቲ» ያጌዳ። 26 አዪሲ ጎፔ፣ ሂንቴ ሃ ዳቡዋ ሚዳ ዋዴ ኡባኒኒ ሃ ፀዓፔ ኡሹዳ ዋዴ ኡባን ጎዳይ ያና ጋካናወካ፣ አ ሃይቁዋ ኦዲታ።

27 ሄዋ ዲራው፣ ቤሴናን ዳዒዴ ጎዳ ዳቡዋ ሚያዌ፣ ዋይ ጎዳ ፀዓፔ ኡሹያዌ ኦኒኒ አ አሹዋኔ አ ሱላ አጮቲ። 28 ሺን አሳይ ባሬ ሁጲያ ፓጮ። ያቲዴ ዳቡዋ ሞ። ፀዓፔካ ኡሹ። 29 አዪሲ ጎፔ፣ ጎዳ አሹዋ ሻኪዴ ኤሬናን ዳቡዋ ሚያዌኔ ፀዓፔካ ኡሹያዌ ባሬ ሁጲዋ ፒርዳ ሜኔ ኡሹ። 30 ሄዋ ዲራው፣ ሂንቴ ጊደን ጮራቲ ዳቡራንቻኔ ሃርጋንቻ ጊዴዲኖ፤ ቃሲ ኡንዴኔዳዋንቲ ሃይቁዲኖ። 31 ሺን ኩኒ ኑ ሁጲያ ቲሙ ፓጮዳንቶ፣ ያሳይ ኑና ፒርዴና። 32 ኩኒ ፒርዴቲያ ዋዴ፣ ሃ አላሚያና ኢቲፔ ፒርዴቲና ማላ፣ ጎዳይ ኑና ሴሬ።

33 ሄዋ ዲራው፣ ታናዳን አማኒያዋንቶ፣ ጎዳ ካወዋ ማናው ሂንቴ ሺቁያ ዋዴ፣ ኢቲ ኢቲዋ ናጊቲ። 34 ኦኒኒ ኮሻቲዳዋ ጊደፔ፣ ኢቲፔ ሺቁያ ዋዴ ያሳ ፒርዳን ሂንቴ ጌሌና ማላ፣ ባሬ ሶዪን ሞ። አቲዳዋ ታኒ ያ ባዴ ጊጊሳና።

12

ጌሻ አያና ኢሞታቲዋ

1 ታናዳን አማኒያዋንቶ፣ ጌሻ አያና ኢሞታቲዋ ሂንቴ ኤራናው ኮያይ። 2 ሂንቴንቲ ያሳ አማኔና ዋዴ፣ ኡባ ዋዴ ካሊያዋዳንካ፣ ሃሳዬና ኤቃቲዋኮ ሂንቴ ቤዳዋ ኤሪታ። 3 ሄዋ ዲራው፣ ያሳ አያናይ ካሌሊያ አሳይ ኦኒኒ፣ «ዬሱሲ ሹቄቶ» ያጊዴ ሃሳዬናዋኔ ቃሲ ጌሻ አያናይ ካሌሊፔፔ አቲን፣ ሃራይ አቶ ኢቲ አሳይኔ፣ «ዬሱሲ ጎዳ» ጋናው ዳንዳዬናዋ ታኒ ሂንቴንታ ኤሪሳይ።

11:23 ማጥ 26:26-28፤ ማር 14:22-24፤ ሉቃ 22:19፣ 20 11:25 ኬሲ 24:6-8፤ ኤርሞ 31:31-34

4 እናና አሞታይ ዲማ ዲማ፤ ሺን ኢሚያ እናናይ ኢቱዋ። 5 ቃሲ ኦሊያ ኦሱ ዲማ ዲማ፤ ሺን ጎዳይ ኢቱዋ። 6 ኦሱዋ ኦላናው ዲማ ዲማ ኦጊ ዲሚን፤ ሄ ኦሊያ ኦጊያ ኡባ ኦሳ ኡባው ቆንጨሲያ ያሳይ ኢቱዋ። 7 ሺን ኦሳ ኡባ ማዳናው፣ ጌሻ እናና ቆንጨሲያ ዋልቃይ ኡባው ሁጲያን ሁጲያን አሜቲዳ።

8 አዪሲ ጎፔ፣ ጌሻ እናናይ ኢቱዋሲ አጶ ኤራቴላ ሃሳያ አሜዳ፤ ቃሲ ኢቱዋሲ ኤራቴላ ሃሳያ አሜዳ። 9 ሄ ጌሻ እናናይ ኢቱዋሲ አማኡዋ አሚዳ፣ ዮኮዋሲ ሃርጋንቻ ፓሊያ ዋልቃ አሜዳ። 10 ጌሻ እናናይ ኢቱዋሲ ማላታ ኦሊያ ዋልቃ አሚዳ፣ ኢቱዋሲ ተምቢቲያ ኦዲያ ዋልቃ አሜዳ። ኢቱዋሲ እናናቱዋ ጊዲዋን ዲሚያ ዲማቴላ ኤሪያ ዋልቃ አሚዳ፣ ኢቱዋሲ ዲማ ዲማ ቃላን ሃሳዪያ ዋልቃ አሜዳ። ቃሲ ኢቱዋሲ ዲማ ዲማ ቃላን ሃሳዪዳዋ ቢሊያ ዋልቃ አሜዳ 11 ሺን ሃ ኡባባ ኦሊያዌ ሄ ኢቲ ጌሻ እናና። ኦሳ ኡባው ኢ ባሬ ኮዪያዋዳን፣ ዲማ ዲማ አሞታ ሻኪ ሻኪዴ አሜዳ።

ኢቲ ቦላን ዲሚያ ዲማ ዲማ አሳቴላቱዋ

12 ኪሪሰቶሲ ጮራ አሳቴላቱ ዲሚያ ኢቲ ቦላ ማላ። ቦላይ ጮራ አሳቴላቱዋፔ ሜዴቴዳዋ ጊደፔካ፣ ኢቲ ቦላ። 13 አዪሲ ጎፔ፣ ኦኒ አዪሁዳ ኦሳ ጊደፔኔ ዋይ ጊሪኬ ኦሳ ጊደፔ፣ ዋይ አይሌ ጊደፔኔ ዋይ ዋማኖ ጊደፔ፣ ኡባይ ኢቲ ጌሻ እናናን ኢቲ ቦላ ጊዳናው ፃማቄቲዶ። ቃሲ ኦኒ ኡባይ ኢቲ ጌሻ እናና ኡሼዶ።

14 አዪሲ ጎፔ፣ ቦላሲ አሳቴላይ ጮራ ጊዲያዋፔ ኦቲን፣ ኢቱዋ ጊዳና። 15 ጌዲ፣ «ታኒ ኩሺያ ጊዳና ዲራው፣ ቦላ ቆሞ ጊዲኬ» ጎፔ፣ ኢ ሄዋ ጊያዌ ቦላ ቆሞ ጊዲያዋ ዲጋኔ? 16 ሃይላይካ፣ «ታኒ አይፊያ ጊዳና ዲራው፣ ቦላ ቆሞ ጊዲኬ» ጎፔ፣ ኢ ሄዋ ጊያዌ ቦላ ቆሞ ጊዲያዋ ዲጋኔ? 17 ቦላይ ኡባይ አይፊያ ፃላላ ጊዲንቶ፣ ዋቲዴ ሲሳናው ዳንዳዪ? ቃሲ ቦላይ ኡባይ ሃይላ ፃላላ ጊዲንቶ፣ ዋቲዴ ሲንጋናው ዳንዳዪ?

18 ሺን ያሳይ ባሬ ኮዪዳዋዳን፣ ቦላ አሳቴላቱዋ ኢቱዋ ኢቱዋ ቦላን ዋሴዳ። 19 ኡባይ ኢቲ ቆሞ ጊዲንቶ፣ ቦላይ ሃቃን ዳዓኔ? 20 ሺን አሳቴላቱ ጮራ ጊደፔካ፣ ቦላይ ኢቱዋ።

21 አዪፊ ኩሺያ፣ «ኦኒ ታና ኮሻካ» ጋናው ዳንዳዪና። ዋይ ቃሲ ሁጲ ጌዳቱዋ፣ «ሂንቴንቱ ታና ኮሺኪታ» ጋናው ዳንዳዪና። 22 ሺን ላፋ ማላቲያ ቦላ አሳቴላቱ ሎይሊ ኮሺያዋንታ። 23 ቦላ አሳቴላቱዋፔ ቦንቼቴናዋንታ ኦሲ ማላቲያዋንታ ኦኒ ሎይሊ ቦንቼቶ። ቃሲ ኦና ዬላዪያ ቦላ አሳቴላቱዋካ ሎይሊ

ቦንቼቶ። 24 ኑ ቦላፔ ቤቲያ ባጋው ማዩ ኮሼና፤ ሺን ፖኪያ ባጋ አሳቴላቱዋ ሎይሌ ማዩዛናዳን፣ ያሳይ አሳቴላ ኢቲፔ ጋሌዳ። 25 ቦላ አሳቴላቱ ኢቲ ኢቲዋሲ ኢቲ ማላ ቆፋ ቆፓናፔ ኣቲን፣ ቦላን ዲማቴላይ ዴዓናው ቤሴና። 26 ቦላ አሳቴላቱዋፔ ኢቲ ሴሌቶፔ፣ ቦላ አሳቴላቱ ኡባይካ እናና ሴሌቲኖ፤ ቦላ አሳቴላቱዋፔ ኢቲ ቦንቼቶፔ፣ ቦላ አሳቴላቱ ኡባይ እናና ናሼቲኖ።

27 ሂንቴንቲ ኡባይ ኪሪሰቶሳ ቦላ፤ ቃሲ ሁጲያን ሁጲያን ሂንቴ ኡባይካ እ ቦላ አሳቴላቱዋ። 28 ያሳይ ዋሳ ጎሌን ኢቲ ኢቲ አሳቱዋ፣ ኮይሩዋን ዩሱሲ ኪቲዳዋንታ፣ ላዔንሉዋን ናባቱዋ፣ ሄዜንሉዋን ታማሪሲያዋንታ፣ ሄዋፔ ጉዩያን፣ ማላታ ኦሊያዋንታ፣ ሄዋፔ ጉዩያን፣ ፓሌያ ዋልቃይ ዴዒያዋንታ፣ ማዲያዋንታ፣ ዋሳ ጎሊያ እዩሲያዋንታ ዲማ ዲማ ቃላን ሃሲያዋንታ ኦሌዳ።

29 ኡባቲ ዩሱሲ ኪቲዳዋንቲ? ኡባቲ ናባቲ? ኡባቲ ታማሪሲያዋንቲ? ኡባቲ ማላታ ኦሊና? 30 ኡባሲ ፓሌያ ዋልቃይ ዴዒ? ኡባቲ ዲማ ዲማ ቃላን ሃሳዩና? ቃሲ ዲማ ዲማ ቃላን ሃሳዩዳዋ ኡባቲ ቢሊና? 31 ሺን ኡባፔ ኣጲያ ኢሞታ ሎይሌ ኮዩቲ።

ቃሲ ኡባፔ ሎይሌ ኣጲያ ኦጊያ ታኒ ሂንቴንታ ቤሳና።

13

ቱሙ ሲቁዋ

1 ታኒ አሳ ቃላኒኔ ኪታንቻ ቃላን ሃሳዮፔካ ታው ሲቁ ጳዮፔ፣ ታ ሃሳያይ ጮ ዋሲያ ዳዋላ ማላ፤ ዋይ ቆልጫካቲያ ዓናዒሊያ ማላ። 2 ናቤቴላ ኢሞታይ ታው ዴዖፔካ፣ ታኒ ጌሜዳ ዩወዋ ኡባኔ ኤራቴላ ኡባ ኤሪንቶካ፣ ቃሲ ዴሪያ ዴንላ ዲጊያ እማኑ ታው ዴዖፔካ፣ ሲቁ ጳዮፔ፣ ታኒ ኣያኔ ጊዲኬ። 3 ታው ዴዒያዋ ኡባ ሂዩሳቱዋ ማዛናው ኢሚንቶካ ሃራይ አቶ፣ ታ ቦላ ታማን ጉዳናው ኣላ ኢሚንቶካ ሲቁ ጳዮፔ፣ ታና ኣይኔ ማዴና።

4 ሲቁ ዳንዳያንቻ። ሲቁ ኬኬ። ሲቁ ቃናቴና። ጨቁቴና፤ ቃሲ ኦቶሬቴና። 5 ሲቁ ባሬው ቤሴናዋ ኦሌና፤ ኡዜቴና፤ ዩሎቴና፤ ሲቁ ናቁቴዳዋካ ፓይዴና። 6 ሲቁ ቱማቴላን ናሼቲያዋፔ ኣቲን፣ ዋርዲዋን ናሼቴና። 7 ሲቁ ኡባባ ዳንዳይ። ኡባባይካ ሃናናዋ ጊዴ፣ ናሼቻን ናጌ። ኡባባኒ ጌንጩ።

8 ሲቁ ሙሊካ ጳይና። ሺን ናቤቴላይካ ኣታና። ዲማ ዲማ ቃላን ሃሳዩያዊካ ኣታና። ኤራቴላይካ ጳያና። 9 ኣዩሲ ጎፔ፣ ኦኒ

12:28 ኤፌ 4:11 13:2 ማጎ 17:20፤ 21:21፤ ማር 11:23

ኤራቴላፔ ፓጫ ኤሬቶ፤ ቲምቢቲያፔካ ፓጫ ኦዴቶ። 10 ሺን ኩሚንጎላ ገዴዳዌ ዪያ ዎዴ፣ ፓጫይ ጳያና።

11 ታኒ ናዓቲላን ዴዒያ ዎዴ፣ ናዓዳን ሃሳያይ። ናዓዳን ቆፓይ። ቃሲ ናዓዳንካ እኩካይ። ዎዳላ ገዴዳ ዎዴ፣ ናዓቲላ ሃኑዎ አጋዲ። 12 ኑኒ ሃዒ ቤዒያዌ ማሰቶቲያን ቤዒያ ለምዒ ለምዒያ ማላ ማላ፤ ሺን ሄ ዎዴ ኑኒ ኑ አይፊያን ቆንጨያን ቤዓና። ሃዒ ታኒ ኤራቴላፔ ፓጫ ኤራይ፤ ሺን ያሳይ ታና ዉርሲዴ ኤሪያዎዳን፣ ሄ ዎዴ ታኒካ ዉርሳ ኤራና።

13 ሺን ሄዎ ገዳፔ፣ አማኑ፣ ሃናናዎ ገዴ ናሹቻን ናገያዌኔ ሲቁ፣ ሃዋንቱ ሄዛቱ ሚኒዴ ዴዒና። ሃዋንቱፔ አጲያዌ ሲቁዎ።

14

ጌሻ አያና አምታኔ ኡንቴንቱ ማዲዎ

1 ሲቁዎ ካለቱ። አያና አምታካ ሎይሊ ኮዪቱ። ሺን ኡባፔ አሊዴ፣ ናቤቴላ ኮዪቱ። 2 አዪሲ ጎፔ፣ ዲማ ዲማ ቃላን ሃሳዪያ ኡራይ ያሳው ሃሳዪፔ አቲን፣ አሳሲ ሃሳዪና። አዪሲ ጎፔ፣ ኢ ሃሳዪያዎ ኦኒኔ አኩኩና። ሺን አሳሲ ቆንጨቤና ዬዉዎ አያና ዎልቃን ሃሳዪ። 3 ሺን ናቢ አሳ ማዳናው፣ ዘራናዉኔ ሚኒሳናው አሳሲ ሃሳዪ። 4 ዲማ ዲማ ቃላን ሃሳዪያ ኡራይ ባሬና ማዴ። ሺን ናቢ ዎሳ ጎሊያ ማዴ።

5 ሂንቴንቱ ኡባይ ዲማ ዲማ ቃላን ሃሳያናዎ ታኒ ደሳይ። ሺን ናቤቴላ ሄዎፔ አላዴ ደሳይ። አዪሲ ጎፔ፣ ዲማ ዲማ ቃላን ሃሳዪያዌ ሄ ሃሳዪዳዎ ዎሳ ጎሊያ ማዳናው ቢሊያ አሳይ ጳዮፔ፣ ዲማ ዲማ ቃላን ሃሳዪያዎፔ ናቤቴላይ አዴ።

6 ሺን ታናዳን አማኒያዎንቶ፣ ሃዒ ታኒ ሂንቴንቱኮ ባዴ፣ ዲማ ዲማ ቃላን ሃሳያዴ፣ ሳፃን ዎይ ኤራቴላን ዎይ ናቤቴላን ዎይ ታማሪሲያዎን ሂንቴንቱሲ ኦዳና ጳዮፔ፣ ታኒ ሂንቴንታ አያ ማዳይታ? 7 ሃራይ አቶ፣ ሺምፑ ባይናባይ ሱሱሊያ ገዲና ዎይ ዲላ ገዲና ካዒዴ፣ ባሬ ካሳ ዲማቴላ ኤሪሳና ጳዮፔ፣ ሱሱሊያ ፑናፔኔ፣ ዎይ ዲላ ዲያፔ፣ አሳይ ዎቲዴ ኤራኔ? 8 ቃሲ ፀሩምባ ዎሱ ሎይሊ ኤሬታና ጳዮፔ፣ ኦላው ኦኔ ገቢታናዎ? 9 ሃዎዳንካ፣ ቃሲ ዲማ ዲማ ቃላን ሂንቴ ሃሳዪያዌ ቆንጨ፤ ገዴናን ጳዮፔ፣ ሂንቴ ሃሳዪያዎ አሳይ ዎቲ አኩካኔ? አዪሲ ጎፔ፣ ጫርኩዎሲ ሂንቴ ሃሳዪታ።

10 ሃ አላሚያን ጮራ ቃላይ ዴዒ፤ ሺን ቢሌላይ ባይና ቃላይ አቱኔ ባዎ። 11 ሺን አቲ አሳይ ሃሳዪያ ቃላ ታኒ ኤራና ጳዮፔ፣ ሄ ሃሳዪያዌ ታው አማላ ገዴ፤ ታኒካ አው አማላ ገዳይ።

12 ሃዋዲንካ፡ ቃሲ ጌሻ አያና አሞታ ሂንቲ አካናው ሎይሌ ኮዪያዋንታ ጊዲያ ዲራው፡ ዋሳ ጎሊያ ዲቻናው ማዳዋ ኡባባፔ አሊዴ ኮዪቲ።

13 ህዋ ዲራው፡ ዲማ ዲማ ቃላን ሃሳዪያዌ ባሬ ሃሳዪዳዋ ቢላናው ዳንዲያና ማላ፡ ያሳ ዋሶ። 14 አዪሲ ጎፔ፡ ታኒ ዲማ ዲማ ቃላን ያሳ ዋሶ፤ ታ አያናይካ ዋሶ፤ ሺን ታ ጋርሳ ቆፋይ አይኔ ጎዔቲና። 15 ያቲና፡ ታኒ ዋቶ? ታኒ ታ አያናን ያሳ ዋሳና፤ ቃሲ ታ ቆፋንካ ያሳ ዋሳና። ታ አያናን ዬፃና፤ ቃሲ ታ ቆፋንካ ዬፃና። 16 ህዋ ጊዳና ጳዮፔ፡ ኔኒ ኔ አያና ፃላላን ያሳ ጋላቲያዋ ጊደፔ፡ ህ ሳባን ኔኒ ጊያዋ ኤሬና አሳይ ኔኒ ያሳ ጋላቲያዋ ኤሬናን፡ ኔኒ ጋላቲያዋን ዋቲዳ፡ «አሜንዲ» ጋኔ? 17 ኔኒ ያሳ ጋላቲያዋ ሎዳ፤ ሺን ህዌ ዮኮ ቢታኒያ ማዳና።

18 ታኒ ዲማ ዲማ ቃላን ሂንቲ ኡባፔ አላዴ ሃሳዪያ ዲራው፡ ያሳ ጋላታይ። 19 ሺን ታኒ ዋሳ ጎሊን ሃራቱዋ ታማርሳናው ዲማ ዲማ ቃላን ታሙ ሻዓ ቃላቱዋ ሃሳዪያዋፔ ኢቼሹ ቃላቱዋ ታ ዋዛና ቆፋን ሃሳያናው ደሳይ።

20 ታናዳን አማኒያዋንቶ፡ ሂንቲ ኢታ ዬወዋን ጉላ ናና ማላ ጊዳናፔ አቲን፡ ቆፋን ጉላ ናና ማላ ጊደፔ፤ ሂንቲ ጋርሳ ቆፋን ዋዛናማቱዋ ጊዲቲ። 21 ያሳ ማፃፋን፡ «ጎዳይ፡ ታኒ ሃ አሳው፡

ዲማ ዲማ ቃላን ሃሳዪያ አሳኒኔ
አማላቱዋ ዶናን ሃሳያና።

ሺን ህዋንካ፡

ታኒ ጊያዋ ኡንቲንቲ ሲሲኪኖ ያጌ»

ጌቲቲዴ ፃፊቲዳ።

22 ሲሚ ዲማ ዲማ ቃላን ሃሳዪያዌ አማኔናዋንቲሲ ማላታ ጊዲያዋፔ አቲን፡ አማኒያዋንቲሲ ማላታ ጊዴና። ቃሲ ናባቱዋፔ ሃሳዬቲያዌ አማኒያዋንቲሲ ማላታ ጊዲያዋፔ አቲን፡ አማኔናዋንቲሲ ማላታ ጊዴና።

23 ህዋ ዲራው፡ አማኒያ አሳይ ኡባይ አቲፔ ሸቂዳ፡ ቃሲ ኡባይካ ዲማ ዲማ ቃላን ሃሳዮፔ፡ ታማሪቤና አሳይ ዋይ አማኔና አሳይ ጌሊዳ፡ ሂንቲንታ ኡባ፡ «ጎዪታ» ጌኔ? 24 ሺን ታማሪቤና አሳይ ዋይ አማኔና አሳይ ዋሳ ጎሊ ጌሊያ ዋዴ፡ አሳይ ኡባይ ቲሞቢቲያ ኦደፔ፡ ኢ ባሬ ሲሲያዋን ባሬ ናጋራ አኬኬ። ቃሲ ህ ሲሴደባ ኡባንካ ኢ ፒርዴታና። 25 አ ዋዛናን ጌሜዳ ቆፋይካ ቆንጫና። ሃዋዲንካ ቃሲ፡ «ያሳይ ቱሙ ሂንቲ ጊደን ዴዔ» ያጌዴ ማርካቲዳ፡ ጉፋኒዴ ያሳው ጎዪናና።

አሳይ ኢትፔ ዋሲያ ዋዴ ዳዓናው ቤሲያ ዋጋ

26 ሲሚ ታናዳን አማኒያዋንቶ፣ አዬ? ሂንቲንቲ ኢትፔ ሸቂያ ዋዴ፣ ሁጲያን ሁጲያን፣ ኢትዋሲ ማዚሙሪ ዳዔ፤ ኢትዋሲ ታማሪሲያዊ ዳዔ፤ ኢትዋሲ ሳፃይ ዳዔ፤ ቃሲ ኢትዋሲ ዲማ ዲማ ቃላን ሃሳዪያዊ ዳዔ፤ ኢትዋሲ ቢሊያዊ ዳዔ። ኡባይካ ዋሳ ጎሊያ ማዲያዋ ገዳናው ቤሴ። 27 ኦኒኔ ዲማ ዲማ ቃላን ሃሳዮፔ፣ ላዑ ገዲዴ፣ ዋይ ዳሮፔ ሄዙ ገዲዴ፣ ካላን ካላን ሃሳያናው ቤሴ። ቃሲ ሃራ ኢቱ ኡንቱንቲ ሃሳዬዳዋ ቢሎ። 28 ሺን ቢሊያ አሳይ ቆዮፔ፣ ዲማ ዲማ ቃላን ሃሳዪያዊ ዋሳ ጎሊያን ጮዑ ጎ። ባሬ ሁጲዔኔ ያሳው ሃሳዮ።

29 ናባቱካ ላዑ ገዲዴ ዋይ ሄዙ ገዲዴ ሃሳዪኖ። ቃሲ ሃራንቲ ኡንቱንቲ ገያዋ ሻኪኖ። 30 ሺን ያሳይ ሄ ሳዓን ኡቴዳ ሃራሲ ኢትባ ቆንጩሶፔ፣ ካሴና ሃሳዪያዊ ጮዑ ጎ። 31 አዪሲ ጎፔ፣ ኡባይ ታማራና ማላኔ ኡባይ ሚናና ማላ፣ ካላን ካላን ቲምቢቲያ ኦዳናው ዳንዳዪታ። 32 ቲምቢቲያ ኦዲያዋንቲ አምታይ ኡንቱንቶ አዛዜቴ። 33 አዪሲ ጎፔ፣ ያሳይ ሳርቲላ ያሳፔ አቲን፣ ጫቡዋ ያሳ ገዳና።

ጌሻቱ ዋሳ ጎሊቱዋ ኡባን፣ 34 ማጫዋንቲ ሸቂዋ ጋርሳን ጮዑ ገኖ። አዪሲ ጎፔ፣ አዪሁዳቱዋ ሂጊ ገያዋዳንካ ኡንቱንቲ ሞዴታናፔ አቲን፣ ሸቂዋ ጋርሳን ሃሳያናው ኡንቱንቶ ማቲ ባዋ። 35 ማጫዋንቲ ሸቂዋ ጋርሳን ሃሳዪያዊ ፖኮ ገዲያ ዲራው፣ አዬንቶ ኡራናው ኮዮፔኔ ሶዪን ባሬንቲ አሲና አቲኖ።

36 ያሳ ቃላይ ኮይሮ ሂንቲፔ ዬዴ? ዋይ ሂንቲ ያላላኮ ዬዴ? 37 ኦኒኔ ባሬና ናቢያ ዋይ ያሳ አያናይ ዳዒያ አሳ ያገዴ ቆፖፔ፣ ታኒ ሂንቲንቶ ያፊያዊ ጎዳ አዛዙዋ ገዲያዋ አኬኮ። 38 ሺን ኦኒኔ አኬካና ቆዮፔ፣ አኬኮፖ ባሺ አጎ።

39 ሄዋ ዲራው፣ ታናዳን አማኒያዋንቶ፣ ቲምቢቲያ ኦዳናው ሎይሊ አምቲቴ። ቃሲ ዲማ ዲማ ቃላን ሃሲያዋካ ዲጎፔ። 40 ሺን ኡባባይካ ዋጋኒኔ ማራን ሃኖ።

15

ኪሪሰቶሲ ሃይቁዋፔ ዳንዴዳባ

1 ታናዳን አማኒያዋንቶ፣ ታኒ ሂንቲንቶ ኦዴዳ ሚሺራቹዋ ቃላ ሂንቲ አኬዳዋኔ ቃሲ ሂንቲ አማኑ ኦኒ ኤቁዳዋ ሂንቲንታ ቆፔላይ። 2 ሂንቲንቲ አማኑ ሚላ ገዳና ቆዮፔ፣ ቃሲ ታኒ ሂንቲንቶ ኦዴዳ ቃላ ሎይሊ ኦይቆፔ፣ ሂንቲ ሄ ሚሺራቹዋ ቃላን አቴዲታ።

3 አዪሲ ጎፔ፣ ታኒ ቃሲ አኩዳዎ ኡባባፔ አጲዳ ኮሺያዎ ካሴታዳ ሂንቲንቲሲ አማዲ። ሄዌ አዬ ጎፔ፣ ያሳ ማፃፋይ ጊያዎዳን፣ ኪሪሰቶሲ ኑናጋራ ዲራው 4 ሃይቂዳ ሞጌቲዳ። ያሳ ማፃፋይ ጊያዎዳን፣ ሄዜንሊያ ጋላሲ ሃይቁዋፔ 5 ዳንዲዳ፣ ጳዲሮሳው ቆንጩዳ። ሄዋፔ ጉዪያን፣ ባሬ ከቲዳ ታማኔ ላዓቶ ቆንጩዳ። 6 ሄዋፔ ጉዪያን፣ ኢቼሹ ፃቲዋፔ ዳሪያ ባሬና ካሊያ አሳው አቲ ካላ ቆንጩዳ። ኡንቲንቲፔ ዳሪያ ባጋይ ሃና ጋካናሲካ ፓፃ ዳዲና፤ ሺን አማሬዳዋንቲ ሃይቁዲና። 7 ሄዋፔ ጉዪያን፣ ያዪቆባው ቆንጩዳ፤ ጉዬፔ ባሬ ከቲዳ ኡባቶ ቆንጩዳ።

8 ቃሲ ኡባፔ ዉርሴላን፣ ዎዲ ጋከናን ዩሌቲዳ ታዉካ ቆንጩዳ። 9 አዪሲ ጎፔ፣ ዩሱሲ ከቲዳ ኡባፔ ታኒ ላፋ፤ ታኒ ያሳ ዎሳ ጎሊያ ዎዪሴዳ ዲራው፣ ዩሱሲ ከቲዳዎ ጌቲታዳ ፃሴታናዉካ ቤሲኬ። 10 ሺን ያሳ አጼ ከካቲላን ታኒ ታናካ። ቃሲ ታው ኢ አማዳ አጼ ከካቲላይ ማላ ጊዲቤና፤ ሺን ታኒ ኡንቲንታ ኡባፔ አላዳ ኦላዲ። ሺን ታናና ዳዲያ ያሳ አጼ ከካቲላይ ኦሌዳፔ አቲን፣ ታና ጊዲኬ። 11 ሲሚ ታና ጊደፔካ፣ ዎይ ኡንቲንታ ጊደፔካ፣ ኑኒ ኡባይ ኦዲያዎ ሃዎ፤ ሂንቲንቲካ ሃዎ አማኔዲታ።

አሳይ ሃይቁዋፔ ዳንዳናባ

12 ኪሪሰቶሲ ሃይቁዋፔ ዳንዳዳዎ ኦዲያዎ ጊደፔ፣ ሂንቲንቲፔ አቲ አቲ አሳቲ ያቲና ዎቲዳ፣ «ሃይቁዳ አሳይ ሃይቁዋፔ ዳንዳና» ያገና? 13 ሃይቁዳ ኡራይ ሃይቁዋፔ ዳንዲቤናዎ ጊደፔ፣ ያቲና ሄኮ ኪሪሰቶሲካ ሃይቁዋፔ ዳንዲቤና ጊያዎ። 14 ኪሪሰቶሲ ሃይቁዋፔ ዳንዲቤናዎ ጊደፔ፣ ያቲና ኑኒ ኦዲያዎካ ማላ፤ ቃሲ ሂንቲ አማኑካ ማላ። 15 ቃሲ ኑኒ፣ «ኪሪሰቶሳ ሃይቁዋፔ ዳንሌዳ» ያገዴ ያሳባ ማርካቲዳ ዲራው፣ አ ዎርዶ ማርካቲዎ ጊዲዳ ቤቲድ። ሺን ሃይቁዳዋንታ ሃይቁዋፔ ኢ ዳንሊቤናዎ ጊደፔ፣ ኪሪሰቶሳካ ዳንሊቤና። 16 አዪሲ ጎፔ፣ ሃይቁዳዋንቲ ሃይቁዋፔ ዳንዳናዎ ጊደፔ፣ ሲሚ ኪሪሰቶሲካ ዳንዲቤና። 17 ኪሪሰቶሲ ሃይቁዋፔ ዳንዲቤናዎ ጊደፔ፣ ሂንቲ አማኑካ ማላ፤ ቃሲ ሂንቲ ሃዎ ጋካናዉካ ናጋራና ዳዲታ። 18 ሲሚ ኪሪሰቶሳ አማኒዳ ሃይቁዳዋንቲካ ቃሲ ቆዬዲና ጊያዎ። 19 ኑኒ ሃ ዴዑዎ

15:3 እሳ 53:5-12 15:4 ማዝ 16:8-10፤ ማት 12:40፤ ከት 2:24-32
 15:5 ማት 28:16-17፤ ማር 16:14፤ ሉቅ 24:34፣ 36፤ ዮሀ 20:19 15:8 ከት 9:3-6

ፃላላው ኪሪስቶስን ሂድቲዳ * ጊደፔ፣ ሃ አላሚያን ዴዒያ አሳ ኡባፔካ ኑባይ ሎዒና።

20 ሺን ኪሪስቶስ ሃይቄዳዋንቱ ዴንዲዋሲ ባይራ ጊዲዴ፣ ሃይቄዋፔ ዴንዴዳዊ ቱማ። 21 አዪሲ ጎፔ፣ ሃይቄ ኢቲ አሳ ባጋና ሃ አላሚያ ዬዳ፣ ሃይቄዳዋንቱ ዴንዲካ ቃሲ ኢቲ አሳ ባጋና ዬዳ። 22 አዪሲ ጎፔ፣ አሳይ ኡባይ አዳማና ኢቲፔቱላ ሜዴዳ ዲራው ሃይቄዳዋዳን፣ ኪሪስቶስና ኢቲፔቱላ ሜዴዳ ዲራው፣ ኡባይ ዴዑዋሲ ዴንዳና። 23 ሺን ኡባይካ ባሬ ካላን ካላን ዴንዳና። ኪሪስቶስ ኡባፔ ካሴቲዴ ዴንዴዳ፤ ሄዋፔ ጉዪያን፣ ኪሪስቶስዋንቱ ኪሪስቶስ ዪያ ዎዴ ዴንዳና።

24 ሄዋፔ ጉዪያን፣ ኪሪስቶስ ማታ ኡባ፣ ጎዳቲላ ኡባኔ ዋሊቃ ኡባ ጳዪሲዴ፣ ያሳው ባሬ አቦ ካወቱላ ኢሚያ ዎዴ፣ ዎዲያ ወርሴላይ ያናዎ። 25 አዪሲ ጎፔ፣ ያሳይ አ ሞርኬቱዋ ኡባ አ ጌዲያፔ ጋርሳና ዎላና ጋካናው፣ ኪሪስቶስ ሞዳናው ቤሴ።

26 ኡባፔ ወርሴላን ጳዪዴ ዴዒያ ሞርኪ ሃይቄዎ። 27 አዪሲ ጎፔ፣ ያሳ ማፃፋይ፣ «ያሳይ ኡባባ አ ጌዲያፔ ጋርሳና ዎሊዴ ሞዲሴዳ» ያጌ። ሺን ኡባባ አ ጌዲያፔ ጋርሳና ዎሊዴ ሞዲሴዳ ጊያ ዎዴ፣ ኡባባ አሌዳ ያሳፔ አቲን፣ ዮኮ ኡባይ ሞዴቲዳ ጊያዌ ቆንጩ።

28 ሺን ኡባባይ ኪሪስቶስው ሞዴቲዳዋፔ ጉዪያን፣ ኪሪስቶስ ቃሲ ባሬ ሁጹው ኡባባ ባሬና ሞዲሴዳ ያሳው ሞዴታና። ያሳይ ቃሲ ኡባባ ወርሲዴ ሞዳና።

29 ሄዋ ጊዳና ጳዮፔ፣ ሃይቄዳዋንቱ ኮታ ፃማቄቲያዋንቱ አያ አሊና? ሃይቄዳዋንቱ ኡባካ ዴንዴናዋ ጊደፔ፣ አሳይ ሃይቄዳዋንቱ ኮታ አዪሲ ፃማቄቲ?

30 ያቲና፣ ኑኒ ኡባ ዎዴ አዪሲ ሃሳዬና ሜቱዋን ጌሌቶ?

31 ታናዳን አማኒያዋንቶ፣ ታኒ ኑ ጎዳ ኪሪስቶስ ዬሱሳን ታው ዴዒያ ሂንቴናን ጩቄታዴ፣ ጋላሳን ጋላሳን ሃይቃይ። 32 ታኒ ኤፌሶኔን አሳ ቆፋዳን ዲዒና ባፄቲዳዊ ታና አያ ማዲ? ሺን ሃይቄዳዋንቱ ሃይቄዋፔ ዴንዴናዋ ጊደፔ፣

«ሲሚ ሞይቲኔ ኡሾይቲ፤ አዪሲ ጎፔ፣ ኑኒ ዎንቲ ሃይቃና» ጊያዎ ማላ።

33 ጩሜቶፒቲ፤ ኢታ ላጌቲላይ ሎዎ ሃናታ ባዪዜ። 34 ዲሎቲላኮ ሲሚቲ፣ ናጋራ አላፒቲ። ሂንቴንቲፔ ኢቲ ኢቲ አሳይ ያሳ ኤሬና፤ ታኒ ሃዋ ሂንቴንታ ዬላያናው ጋይ።

* 15:19 ሂድታ፡ ኪሪስቶስን ኑ ዎሊዳ ኑ ኡባ ሂድታይ፡ ሃ አላሚያን ዴዑዋሳ ጊደፔ፡ ሃ አላሚያን ዴዒያ ሃራ አሳቱዋ ኡባፔካ ኑባይ አዲዴ ኢታ፡ ጉሳ። 15:25 ማዝ 110:1 15:27 ማዝ 8:6 15:32 አሳ 22:13

ሃይቁዋፔ ዴንዴዳ ቦላ ሃናታ

35 ሺን ኢቲ አሳይ፡ «ሃይቁዳ አሳይ ዋኒዴ ዴንዳኔ? ኢንቲንቲ አያ ማላ ቦላና ያኔ?» ያጌናን ኣጌና። 36 ኔኖ ኤያው፡ ኔኒ ጋዲያን ዜሪያ ዜሪላይ ሃይቁናን ሞኬና። 37 ኔኒ ዜሪያዌ ዛርጋ ጊዲና ዋይ ሃራ ቆሞ ካላ ጊዲና፡ ኣይፊያ ፃላላፔ ኣቲን፡ ላሚ ደሊዴ ኬሲያዎ ጊዴና። 38 ሺን ፆሳይ ዜሪላው ባሬ ደሴዳ ቦላ ኢሜ፤ ቃሲ ዜሪላ ኡባሲካ ሁጲያን ሁጲያን ኢንቲንቲ ቦላ ኢሜ። 39 ሜዴታ ኡባ ኣሹ ኢቲዎ ጊዴና። ሺን አሳ ኣሹ ኢቲዎ፤ ሜሂያ ኣሹ ዲማ፤ ካፋቲዎ ኣሹካ ዲማ፤ ቃሲ ሞሊያ ኣሹካ ዲማ።

40 ቃሲ ሳሉዎ አሳቴላቲኔ ሳዓ አሳቴላቲ ዴዒና። ሺን ሳሉዎ ቦላ ቦንቹ ዲማ፤ ቃሲ ሳዓ ቦላ ቦንቹ ዲማ። 41 ኣዋይፊያሲ ኣ ሁጲ ቦንቹ ዴዴ። ኣጌናሲካ ኣ ሁጲ ቦንቹ ዴዴ። ቃሲ ያለንታቲዎሲካ ዲማ ቦንቹ ዴዴ፤ ኣያው ጎፔ፡ ኢቲ ያለንቲ ዮኮ ያለንቲያፔ ቦንቹዎን ዲማቲ።

42 ቃሲ ሃይቁዳዎንቲ ሃይቁዋፔ ዴንዲያ ዎዴ ሄዎዳን ሃናና፤ ሃይቁያ ቦላይ ሞጌቲዴ፡ ሃይቁና ቦላ ጊዲዴ ዴንዳና። 43 ቦላይ ቶሺያን ሞጌቲዴ፡ ቦንቹዎን ዴንዳና። ቃሲ ዳቡራን ሞጌቲዴ፡ ዎልቃን ዴንዳና። 44 ሜዴታ ቦላይ ሞጌቲዴ፡ ጌሻ ኣያናን ካሌሴቲያ ቦላ ጊዲዴ ዴንዳና። ሜዴታ ቦላይ ዴፆፔ፡ ቃሲ ጌሻ ኣያናን ካሌሴቲያ ቦላይካ ዴዴ።

45 ሃዎዳንካ፡ ቃሲ ያሳ ማፃፋን፡ «ኮይሮ ቢታኒ፡ ኣዳሚ፡ ፓፃ ዴዒያ አሳ ጊዲዴ ሜዴቲዳ» ያጌ። ሺን ዉርሴላ ኣዳሚ ዴዑዎ ኢሚያ አሳ ጊዴዳ። 46 ሺን ሜዴታ አሳይ ኮይሮ ዪና፡ ጌደፔ ኣያና አሳይ ዬዳፔ ኣቲን፡ ኣያናዌ ኮይሮ ዪቤና። 47 ኮይሮ ኣዳሚ ቢታፔ ሜዴቲዳ፤ ኢ ቢታፔ ሜዴቲዳዎ። ላዒንሉዎ ኣዳሚ ሳሉዋፔ ዬዳ። 48 ሃ ሳዓ አሳቲ ቢታፔ ሜዴቲዳዎ ማላቲና። ቃሲ ሳሉዎ አሳቲ ሳሉዋፔ ዬዳዎ ማላቲና። 49 ኮኒ ቢታፔ ሜዴቲዳዎ ማላ ማዬዳዎዳን፡ ሳሉዋፔ ዬዳዎ ማላካ ቃሲ ማያና።

50 ታናዳን ኣማኒያዎንቶ፡ ታኒ ጊያዌ ሃዎ፤ ኣሹኔ ሱላይ † ያሳ ካዉቲላ ላታና ዳንዳዬና። ቃሲ ዎቂያዌ ዎቁናዎ ላቲና።

51-52 ሲሲቲ! ታኒ ሂንቲንቶ ኢቲባ ፀራይ። ኮኒ ኡባይ ሃይቆኮ። ሺን ዉርሴላ ፀራምባይ ፑኔቲያ ዎዴ፡ ሊጴዳ ኣይፊ ያላናሲ ዎዛና ኣሌናን ላሚታና። ኣዪሲ ጎፔ፡ ፀራምባይ ፑኔቲያ ዎዴ፡ ሃይቁዳ አሳይ ዎቁና አሳ ጊዲዴ ዴንዳና፤ ኮኒካ ላሚታና።

15:45 ደም 2:7 † 15:50 ሃ ሳዓ ቦላ ዴዒዴ አሳይ ማዬዳ ኣሹዋኔ ሱላ፡ ጉሳይ ሃ ኣላሚያ አሳቴላ ጉሳ።

53 አዲሲ ጎፔ፣ ሃዌ ዋቂያዌ ዋቁናዋ ማያናው ቤሴ፤ ቃሲ ሃዌ ሃይቂያዌ ሃይቁናዋ ማያናው ቤሴ።

54 ሺን ሃዌ ዋቂያዌ ዋቁናዋ ማዲያ ዋዴ፣ ቃሲ ሃዌ ሃይቂያዌ ሃይቁናዋ ማዲያ ዋዴ፣ ሄ ዋዴ፣ ያሳ ማፃፋይ፣

«ሃይቁ ያኔቲዴ ሚቴቴዳ።

55 ሃይቆ፣ ኔ ዩሻይ ሃቃኔ?

ሃይቆ፣ ኔ ያኑ ሃቃኔ?»

ጌዳ ቃላይ ፖሌታና። 56 ሃይቁ ዱኪያ ዋልቃ ናጋራፔ ዴሜ፤ ቃሲ ናጋራይ ዋልቃ ሂጊያፔ ዴሜ። 57 ሺን ኑ ጎዳ ዩሱሲ ኪሪሰቶሳ ባገና ኑና ያኒሲያ ያሳ ጋላታይ ጋኮ።

58 ታኒ ሰቂያ ታናዳን አማኒያዋንቶ፣ ሄዋ ዲራው፣ ቃፃናን ሚኒ ኤቂቴ። ሂንቴንቱ ዳቡራይ ጎዳ ባገና ሜላ ጊዴናዋ ኤሪዴ፣ ኡባ ዋዴ ጎዳ ኦሱዋ አዛሌናን ኦሴቴ።

16

ዩራሳላሜን ዴሲያ አማኒያ አሳው ሺቂዳ ሚሻ ማዲዋ

1 ያሳ አሳቶ ሚሻ ሺሻናው ጋላቲያን ዴሲያ አማኒያ አሳቶ ታኒ ቃላ ጌሌዳዋዳን፣ ሂንቴንቱካ ቃሲ ሄዋዳን ኦሴቴ። 2 ሂንቴንቱ ታኒ ያ ቢያ ዋዴ፣ ሚሻ ሺሺና ማላ፣ ሂንቴ ኡባይ ዋጋ ጋላሲ ጋላሲ፣ ሂንቴ ዴሚያ ኬናፔ ሂንቴ ጎሌን ዴጋዩቴ። 3 ታኒ ያ ጋኪያ ዋዴ፣ ሂንቴ አማኒያ አሳ ኦና ጊዶፔኔ፣ ሂንቴ አሜዳዋ ጋሳና ማላ፣ ዳቢዳቢያና ኡንቴንታ ዩራሳላሜ ኪታና። 4 ቃሲ ታኒ ኡንቴንቱና ባናው ኮሾፔ፣ ኡንቴንቱ ታናና ኢቴፔ ባናዋንታ።

ጳውሎሳ ቆፋቱዋ

5 ታኒ ማቂዶኒያና አጳዴ፣ ሂንቴንቱኮ ባና፤ አዲሲ ጎፔ፣ ታኒ ማቂዶኒያና አጳይ። 6 ታኒ ቢያሳ ሃቃ ጊዶፔኔ፣ ታ ቡሳን ሂንቴ ታና ማዳና ማላ፣ ሂንቴ ማታን አማራዳ ዋዲያ ጋሚዴናን አጊኬ። ዋይ ባልጉዋካ ሂንቴ ማታን ሻጬናን ዋያ አጋና። 7 አዲሲ ጎፔ፣ ታኒ ሃሚ ያና አጳዴ ሄ ኦጊያና ሂንቴንታ ቤዳናው ኮዩኬ። ጎዳይ ጎፔ፣ ሂንቴ ማታን አማራዳ ዋዲያ ታካናው ቆፓይ።

8 ሺን ታኒ ጳንዴቆሰቲ ጊያ ጋላሳይ ጋካናው ኤፌሶኔን ጋሚዳና። 9 ታው ኦሱ ኩሜዳ አኮ ፔንጊካ ያኒ ዶዬቴዳ። ቃሲ ታው ጮራ ሞርኬቱ ዴሲና።

10 ዊዋቶሴ ሂንቴንቱኮ ዮፔ፣ ሂንቴ ማታን ኢ ያዩናን ዴዳናዳን፣ አ ሎዶሴ ኦይቂቴ። አዲሲ ጎፔ፣ ኢካ ቃሲ ጎዳ ኦሱዋ ኦሴ። 11 ሄዋ

ዲራው፣ ኦሪኔ ኣ ካጵፖ። ሺን ኢ ታኮ ሳር ሲማና ማላ፣ ኣ ማዲዳ ሳርቴላን ሞዪዚቴ። ኣዪሲ ጎፔ፣ ታኒ ኢ ኢሻቱዋና ሲማናዋ ናጋ ኡታዲ።

12 ሺን ኦ ኢሻ ኣጲሎሲ ዮኮ ኢሻቱዋና ሂንቴንቱኮ ባና ማላ፣ ታኒ ኣ ሚኒሳ ዋሳዲ። ሺን ሃዒ ሂንቴንቱኮ ባናው ኮዪቤና፤ ኢ ባሬው ሚኪያ ዋዴ ሂንቴንቱኮ ባናዋ።

ወርሴላ ዞሪያኔ ሳርታ

13 ቤጎቲቴ። ኣማኑዋን ሚኒ ኤቂቴ። ፃሊቴ። ጎቢቴ። 14 ኦሱዋ ኡባ ሲቁዋን ኦሊቴ።

15-16 ታናዳን ኣማኒያዋንቶ፣ ኢሰዲፋኖሲኔ ኣ ሶይ ኣሳይ ገሪኬን ኮይሮ ኣማኔዳዋንታ ገዲያዋኔ ፆሳ ኣሳቱዋሲ ኦላናው ባሬንታ ኣሚዳዋ ሂንቱ ኤሪታ። ሂንቴንቱካ ኡንቱንቱ ማላ ኣሳሲኔ፣ ኡንቱንቱና ኦሊያ ኡባው ዳቡሪያ ኡባው ኤኖ ጋናዳን፣ ታኒ ሂንቴንታ ዋሳይ።

17 ኢሰዲፋኖሲ፣ ፓርድናዲኔ ኣካይቆሲ ሂንቱ ባይናሳን ታና ቦራሲሲቤና ዲራው፣ ኡንቱንቱ ዩሳን ታኒ ናሼታይ። 18 ኡንቱንቱ ሂንቴንታ ኣያናን ሚኒሴዳዋዳን፣ ታናካ ኣያናን ሚኒሴዳ ዲራው፣ ሄዋንቱ ማላ ኣሳቱዋ ደጎፒቴ።

19 ኢሲያን ዴዒያ ኣማኒያ ኣሳይ ሂንቴንታ፣ «ሳሬ፣ ሎዔ» ገና። ኣቁላይኔ ጲሪሰቁላ ባሬንቱ ሶዪን ሺቂያ ዋሳ ጎሌ ኣሳናካ ሂንቴንቶ ጎዳ ሳርታ ዋዛናፔ ከቲኖ። 20 ኢሻቱ ኡባይ ሂንቴንቱሲ ሳርታ ከቲኖ።

ኢቱ ኢቱዋና ጌሻ ዩሬታ ዩሬቲዴ ሳርቴቲቴ። 21 ታኒ ጳወሎሲ ሃ ሳርታ ታ ከሺያን ፃፋዲ።

22 ጎዳ ዩሱሲ ከሪሰቶሳ ሲቁና ኣሳይ ዴፆፔ፣ ኢ ሸቁቴዳዋ ገደ። ኦ ጎዳው፣ ሃያ።

23 ጎዳ ዩሱሲ ከሪሰቶሳ ኣጵ ኬካቴላይ ሂንቴንቱና ገደ።

24 ከሪሰቶሳ ዩሱሳን ዴዒያ ሂንቴንቱ ኡባና ታ ሲቁ ገደ። ኣሚንዒ።

Ooratha Caaquwaa New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source
files dated 29 Jan 2022
585b63ca-b8e6-55c8-bfef-10bdc95ad69c